



崇禎朝記事

97.451
5339
3


3





Seal impression in seal script (Zhuanshu) characters, likely reading '大清朝' (Great Qing Dynasty).

崇禎朝
己未年



4205411

卷緒巾酉志維盛
氏用舊鈔足本開
影

崇禎朝記事卷一

江陰李遜之庸公

毅宗烈皇帝爲光廟第五子母選侍劉氏後追諡爲孝純太后萬曆三十八年庚戌十二月二十四日卯時生於東宮孝純早逝撫育於李莊妃天啟二年九月冊封爲信王七年二月就外邸成婚冊妃周氏是爲烈皇后后爲兵馬司周奎之女奎係蘇州府長洲縣人後封嘉定伯熹廟病亟時魏璫方張盛中外危慄上在信邸爲魏璫疑忌常稱疾不朝謁至是詔入見諭以吾弟當爲堯舜上懼不敢當但言陛下爲此語臣應萬死熹廟再以善視中宮爲託又言忠賢宜委用上益懼求出至八月甲寅日熹廟已宴駕諸奸祕不傳翌日凶聞彰露始宣皇后懿旨告外逆璫遣涂文輔等迎入宮上自危甚袖食物以進不敢食宮中物也是時羣臣無得見上者上秉燭坐久之見一闍攜劍以過取視之畱置几上許給以賞聞巡邏聲勞苦之問左右欲給以酒食安從取乎侍者對宜問之光祿寺傳令旨取給之歡聲如雷以二十四日卽皇帝位於中

崇禎朝言事一
極殿受百官朝朝時忽天鳴諭免召買香燭節省三萬餘兩加恩文武軍民人等賞賚守邊官軍諭內閣動支戶部太倉銀三十萬兩兵部太僕寺馬價銀三十萬兩工部二十萬兩順天府按括稅契等項銀一萬兩各運給發內閣奉上傳凡本內遇天地祖宗列后字樣俱要出格朕不敢與天地祖宗並傳旨遵行上一日御便殿閱章奏聞香煙心動疑之出步階城閒乃定詢問內官此自何至曰宮中舊方上叱毀之勿復進太息曰皇考皇兄皆爲此設也

九月甲子朔太監魏忠賢乞辭廠務不允奉聖夫人客氏准出外宅給寧國公魏良卿安平伯魏鵬翼鐵券太監李永貞疏病准回籍調理

客氏既奉旨出宮於五更衰服赴梓宮前出一小函用黃色龍袱包裹先帝胎髮痘痂及累年剃髮落齒指甲等焚化痛哭而

去後奉旨籍其家命太監王太政嚴訊之得宮人有娠者八人蓋出入掖庭多攜其家侍媵冀如呂不韋李園事也上大怒命赴浣衣局掠死後仍僂屍凌遲子侯國興伏誅客光先客璠楊六奇等永成忠賢肆惡皆與客氏同謀成之其危中宮害裕妃成妃用王體乾殺王安皆客氏之造意也光先璠皆客氏兄子楊六奇忠賢之壻

上初卽位所以優禮客魏者一如嘉廟而潛邸承奉盡易以新銜入內供奉其李朝欽裴有聲王秉躬吳光承談敬裴方等次第准其乞休逆賢羽翼翦除一空復散遣家丁然後黜逐逆賢肘腋大奸不動聲色潛移默奪非天縱神武何以有此四大朝廷臣俱用朝衣朝服內閣則否惟歲除祭中霤之神司禮監掌印代行祭禮奏請祭服服之大朝止磕頭呼萬歲而已逆賢擅政凡遇大朝與王體乾等下至牌子俱僭用朝衣冠於乾清宮大殿內照外庭儀制行慶賀山呼禮贊禮內閣一如鴻臚班首亦

致詞焉後魏良卿晉封逆賢改戴貂蟬冠位在王體乾上烈皇登極逆賢欲仍照熹廟行禮繼憚上英明止用本等服色同衆叩頭呼萬歲

御史楊維垣疏論崔呈秀依附魏忠賢立志卑污居身穢濁上答以諸臣俱經先帝簡擢不得妄詆

御史賈繼春參崔呈秀以聽勘御史未及二年驟升宮保賣官鬻爵貪淫穢迹不可枚舉田吉以殿試而被懷挾之參瓦全已幸乃二載曹郎而至尙書極品叨名器如承蠲單明詡踰期主政而督撫侍郎取節鉞如拾芥又笑破士林之口應聽自裁工部主事陸澄源上言四事一正士習比來士氣漸卑惟以稱功頌德爲事如廠臣魏忠賢奏疏不書姓名盡廢君前臣名之禮祝釐徧於海內奔走狂於域中士風之卑莫此爲甚一糾官邪如尙書崔呈秀貪橫無恥臺臣雖悉其概其惡實罄竹難書一安民生立枷之法爰書未定而命已斃廠衛深文株連蔓引慘酷不忍言一足國用今

之勲廕充塞滿路祿費不支又如忠賢生祠在在創立費不下百萬及今變賣尙可得數十萬金兵部主事錢元愨疏言巨奸崔呈秀雖已鋤去然呈秀之惡皆緣藉忠賢之權勢忠賢以梟獍之姿供綴衣之役先帝念其服勤假以事權羣小蟻附稱功頌德徧滿天下幾如王莽之妄引符命列爵三等昇於乳臭幾如梁冀之一門五侯徧列私人分布要津幾如王衍之狡兔三窟與珍輦寶藏積肅寧幾如董卓之鄙鄙自固動輒稱旨箝制百僚幾如趙高之指鹿爲馬誅鋤士類傷殘元氣幾如節甫之鉤黨株連陰養死士陳兵自衛幾如桓溫之壁後置人廣開告誣道路以目幾如則天之羅鉗吉綱天佑國家誕啟聖明然羽翼未除陰謀未散可漫焉不加意乎至魏良卿輩既非開國之勲又非從龍之寵安得玷茲茅土又如告訐獲賞之張體乾鍛鍊驟貴之楊寰夫頭乘輪之張淩雲委官開棍之陳大同號稱大兒之田爾畊盜國契友之白太始等凡爲忠賢之爪牙鷹犬俱宜正其罪或亟或放則奸黨肅清

矣御史吳尚默疏言賊臣之身已去賊臣之惡未暴呈秀鬻身奧援之門入賓閣寺之幕不顧笑罵稱功頌德天下幾不知有廉恥立馬之呼屢斥朝陽之音罕聞天下幾不知有名節疏揭一入家籍沒而身齋粉人人重足天下幾不知有身家將作何事乃與奪情天下幾不知有倫理都察一院而設四憲臣左都一秩而設兩獨座天下幾不知有名位甚者先帝易賈將及乃連章累牘頒爵賞而列封廕羣臣謝恩之日卽先帝賓天之日天下幾不知有改革之大故論及此而賊臣之罪案定厥臣魏忠賢之罪案亦可定矣貢士錢嘉徵疏劾魏忠賢十大罪一曰並帝內外封章必先關白稱功頌德上配先帝及奉俞旨必曰朕與厥臣二曰蔑后皇親張國紀未罹不赦之條恨皇后當御前而折逆奸遂羅織國紀欲置之死幾危中宮三曰弄兵祖宗朝不聞有內操之制忠賢外脅臣民內逼宮闈操刀厲刃礮石雷擊深可寒心四曰無祖二祖列宗

皇皇垂訓中涓不許干預朝政乃忠賢於軍國重事一手障天凡邊腹重地漕運咽喉多置腹心意欲何爲五曰剋削藩封三王之國莊田賜賚甚薄而忠賢封公侯伯之士田膏腴萬頃六曰無聖先師爲萬世名教之主忠賢何人敢建祠太學之側七曰濫爵古制非軍功不侯忠賢有何功績而襲上公之封八曰邀邊功遼左失陷未恢寸土而封侯封伯聯鑣冒賞九曰傷民財祠宇徧天下糜費金錢萬萬敲骨剝髓孰非小民之脂膏十曰褻名器制科取士慎重關防忠賢所私崔呈秀之子鐸且不識丁竟玷賢書疏入俱報聞先是已准崔呈秀回籍守制同時奪情者又有工部尙書李養德延綏巡撫朱童蒙俱准丁憂去忠賢再疏引疾求退准回私宅調理寧國公魏良卿改錦衣衛指揮使東安侯魏良棟改指揮同知安平伯魏鵬翼改指揮僉事尋有旨安置忠賢于鳳陽安置徐應元于顯陵應元故信邸承奉以從龍升司禮得忠賢賄爲之左右上知之故并得罪

十一月初四日諭兵部逆惡魏忠賢擅竊國柄蠹盜內帑陷誣忠直草菅多命本當肆市以雪衆冤姑從輕降發鳳陽豈巨惡不思自改輒敢將素蓄亡命之徒身帶凶刃環擁隨衛勢若叛然朕心甚惡著錦衣衛卽遣的當官拏前去扭解押赴彼處交割明白其經過地方各該督撫等官多撥官兵沿途護送所有跟隨羣奸卽擒拏具奏勿得縱容遺患時旂官方出京忠賢至阜城縣聞信卽自縊於飯店中其名下隨身用事李朝欽同縊死焉崔呈秀亦報縊死于家旋奉旨各犯家產俱籍沒入官各處生祠盡行拆毀變價解京其忠賢在京原賜第宅一所命不必變賣畱俟東西底定以賜有功之臣榜曰策勳府

夏允彝曰烈皇不動聲色逐元兇處奸黨宗社再安旁無一人之助較之世宗爲更難時在朝皆奄黨莫發其奸維垣首糾呈秀始自相攜貳然於璫仍不敢致譏澄源元愨乃直指璫罪至嘉徵所言更詳盡璫不勝憤哭訴于上愈觸上怒卽放之出至

中途偵知上必重處遂自縊死呈秀列姬妾并羅列珍異酒器縱飲飲一杯卽擲壞之飲已自盡天地再辟皆上獨斷也嘉徵循循大雅以貢爲縣令元愨擢司銓澄源屢與東林反唇所行多不簡以京察錮之爲善不卒惜哉楊維垣又疏參魏良卿奉旨逆孽魏良卿法當籍沒著內外官將有名人犯拘究僧浴光嚴緝務在必獲其原籍肅寧家產撫按嚴加封固查明具奏

當逆璫盛時曾以十萬金構一佛刹延浴光爲主僧璫旣敗平時往來者俱絕迹矣浴光獨延之一飯俄而維垣參疏詞及浴光人盡爲危之浴光曰吾不出無以安此法屬挺身赴京維垣見之大驚曰不意卽師業上疏矣奈何前此維垣曾求光薦引于璫光卻之至是色沮恐其吐實光殊無此意也夫以出家學道之人而受逆璫供養其人固無足取然視維垣輩身列衣冠而前後反覆始則鑽穴呈身繼則參論以博名高其人之賢不

肖相去又何如哉

刑部爲遵旨會議事奉旨逆惡魏忠賢掃除厥役憑藉寵靈睥睨
宮闈荼毒良善非開國而妄分茅土逼至尊而自命尙公盜帑弄
兵陰謀不軌逆婦客氏傳遞消息把持內外崔呈秀委身奸閹無
君無親明穰威福之權大開縉紳之禍無將之誅自有常刑既會
議明確著行原籍忠賢於河間府戮屍凌遲呈秀於薊州戮屍斬
首仍將爰書刊布中外魏志德等俱發煙瘴地面永遠充軍
罷蘇杭織造諭曰封疆多事征輸繁重朕甚憫焉不忍以衣被組
繡之工重困此一方民俟東西底定之日方行開造以稱朕敬天
恤民之意

撤回各邊鎮守內官諭兵部曰軍旅大事必事權一而後號令行
矧宦官觀兵古來有戒今于各鎮守內官盡行撤回一切相度機
宜約束吏士無事修備有事卻敵俱聽督撫便宜調度無復委任
不專體統相軋各督撫諸臣及大小將領務殫竭忠盡以副朕懷
諭吏部魏忠賢崔呈秀天刑已殛臣民之忿稍舒而詔獄游魂猶
然鬱錮含冤未伸著部院并九卿科道將已前斥害諸臣從公酌
議采擇官評有非法禁繫情最可憫者應褒贈卽與褒贈應卹廢
卽與卹廢其削奪牽連者應復官卽與復官應起用卽與起用有
身故捏贓難給家屬波累羈囚者應開釋卽與開釋勿致久淹傷
朕好生之心至元年三月吏部始以死事諸臣列名上請贈卹有
加疏詳載

刑部奉旨廠衛深文附會鍛鍊朕深爲痛恨耿如杞著與開復原
職胡士容李柱明俱改擬發落方震孺惠世揚著九卿科道會議
耿以不拜逆祠得罪胡任薊州兵備爲崔呈秀所陷李任戶部管
倉誣以盜米被獲逆瑞以此敘功方以封疆惠以移宮皆誣坐大
辟至是俱得釋而部院初猶擬方惠二人改斬爲戍再擬始復官
起用云如杞疏言撫臣劉詔上建祠疏怪臣不肯呈詳乃取忠賢
像懸之喜峰見者俱五拜三叩頭呼九千歲臣見其像冕旒也半

揖而行詔卽馳報忠賢參臣逮問矣臣入鎮撫司許顯純酷刑所
加甚於盜賊反叛懸坐贓六千三百兩家資變盡親友代完乃得
送刑部問成大辟押赴市曹者日有聞幸遇皇上出臣於獄准
復原職乞容臣回籍調理奉旨著卽銓補優缺以旌直氣不必陳
請方震孺亦具疏陳被誣始末略云縉紳之禍至臣等而極今卽
荷雨露之恩宜永銷報復之念若纔作藩籬之因便又種園扉之
果願以之爲報被罪諸人規旣遇聖主攀龍鳳者建豎固奇狎鷗
鷺者夢魂亦穩假使逆璫不遭天譴卽蠖伏空山得安枕乎又願
以之爲廢棄諸臣規猶有請焉逆璫秉政最善深文經廠衛者冤
苦固多卽不經廠衛者冤苦亦復不少且恩詔減等齊民得之猶
易縉紳得之反難臣在獄與諸臣累言儻異日蒙生必以此情控
于皇上今旣邀高厚敢負此心哉乞敕下法司從公盡數公審一
番此又臣附於工營芻蕘之後者也

監生胡煥猷疏論大學士黃立極施鳳來張瑞圖李國櫓當忠賢
專擅揣摩意旨專事逢迎省直建祠各撰碑稱頌宜急罷去并糾
各撫按之請建祠者奉旨下刑部問刑部侍郎李若桂輒引臥碑
生員禁言事律論杖除名四輔各具疏辨託言忠賢碑文使其游
士食客自爲之至於取旨褒贊則文書官稱上命票擬臣等不能
盡職計惟有見幾之作而徘徊其間冀有毫髮之益於國亦少盡
區區之心耳并引陳平周勃狄仁傑事上優容之未幾四輔相繼
去位惟國櫓陛辭疏言煥猷書生義憤勃然自今觀之其言有一
不行否用其言而棄其人何以發忠義之氣願還之冑監以作敢
言從之時謂高陽此舉猶覓相度勝同事諸人多矣四輔旣被劾義
難久畱因合疏請枚卜允之令部院會推以十人名具題是時逆
璫餘醜未滅邪議尙存上明聖知列名前後不無意識爲貯名金
瓶中對天焚告行一拜三叩頭禮以飭夾之首得錢龍錫次李標
次來宗道次楊景震輔臣以天下多事求廣一二上乃復夾得二
則周道登劉鴻訓也未幾來以署部時爲崔呈秀之母請卹有在

天之靈語爲言路所糾楊在掌院時有頌疏上益疑會推之不足
信始從衆望特諭召起舊輔韓蒲州矣
御史楊維垣既疏參崔呈秀擬與羣奸共收餘燼力持殘局時已
差河東巡鹽矣掌道安伸疏請畱佐大計凡削籍諸臣雖屢奉起
用之旨維垣一手握定百方阻遏其游移兩歧及本邪黨而偶被
逐者始爲推轂於是編修倪元璐上方隅未化正氣未伸疏略言
曰凡攻崔魏者必列東林爲對案名曰邪黨以東林諸臣爲邪人
黨人將以何名加之崔魏之輩崔魏而既邪黨矣向之劾忠賢論
呈秀者又邪黨乎哉且天下論議盜涉假借必不可不歸於名義
士人行己寧任矯激必不可不準諸廉隅自以假借矯激深咎前
人而虎彪之徒公然毀裂廉隅背叛名義於是乎連名頌德生祠
而地矣夫頌德不已必將勸進生祠不已必且呼嵩猶寬之曰無
可奈何不得不然耳充一無可奈何不得不然之心又將何所不
至哉今大獄之後湯火僅存猶以道學封疆四字持爲鐵案深防

報復竊以爲過計也未因爲舊輔韓爌詞臣文震孟辯雪浮謗請
賜召用又言鄒元標宜易名海內書院宜修復維垣隨出詞臣持
論甚謬生心害政可虞疏糾之倪復出微臣平心入告臺臣我見
未除疏略云維垣折臣盛稱東林以東林之護李三才熊廷弼也
亦知東林中有首參魏忠賢二十四大罪之楊漣及提問崔呈秀
欲追賊擬戍之高攀龍乎且當時之議於三才也特推其揮霍之
略未嘗不指之爲貪於廷弼也特未卽西市之誅未嘗不坐之以
辟則猶未爲失論失刑今以忠賢之窮凶極惡維垣猶尊稱之曰
廠臣公廠臣不愛錢廠臣爲國爲民何況三才以虎彪之交結近
侍律當處斬初擬止於削奪豈不驕兒護之維垣不聞駁正又何
尤昔人之護熊廷弼至行賄之說自是逆璫借此爲楊左諸臣追
贓地耳初擬以移宮一案殺諸臣及獄上而以爲難于坐贓再傳
覆訊改爲封疆派贓毒比此天下共知者奈何尙守是說乎王紀
以參沈淮忤逆璫而譴斥文震孟以薦王紀而降削均得罪於璫

者耳試觀數年來破帽蹇驢之輩較超階職級者孰爲榮辱自此
義不明於是畏破帽蹇驢者相率爲頌德建祠而希蟒玉馳驛者
遂呼父呼九千歲而不顧矣逆璫毀書院逐正人鉗學士大夫之
口鄒元標以僞學見驅逆璫遂以眞儒自命學宮之席儼然揖宣
聖爲平交使講學諸臣在豈遂至此維垣以無可奈何之心爲頌
德建祠解嘲假令呈秀舞蹈稱臣於逆璫諸臣便以爲無可奈何
而盡舞蹈稱臣乎又令逆璫以兵劫諸臣使從叛逆諸臣亦以爲
無可奈何俛首從叛乎初疏入平湖施鳳來擬票有持論未當之
旨蓋猶堅持璫局也至再疏入上親覽心動得奉諭旨維垣輩毒
網始無所施人謂二疏實爲廓清首功也
御史高弘圖疏言魏忠賢亂政竊權謀爲不軌廷臣但指爲奸皇
上暴其罪狀名曰逆從此凌遲戮屍頒布爰書而案始定虎彪怙
寵毒害忠良法司初擬未減皇上列其顯慝敕用重典從此論斬
遣戍明著讞詞而案始定若夫傾危社稷搖動宮闈顯稱擁衛之

干戈爭作反叛之羽翼如劉詔劉志選梁夢環者罪實浮於虎彪
詔以天子憲臣于忠賢像呼九千歲行五拜三叩頭禮非倡逆九
邊使效尤乎又於先帝彌留日遵化教場點兵更置將領精甲良
馬皆忠賢頒賜家丁直接都門非大聖人出而內外應合非詔而
誰先帝在宮無驪褻之寵凡魚貫而進者非忠賢所貢概行殘害
憚后父張國紀志選夢環連章糾劾一旦易后謀成兩賊爲華歆
矣志選僅與潘汝楨同削夢環弗與倪文煥同逮則閣臣票擬模
稜非所以爲訓也奉旨志選夢環著撫案提問劉詔先行革職
御史葉成章疏言李實督造蘇松參楊姜坐贓巡撫周起元力救
之起元參道臣朱童蒙實送贊于忠賢削逐起元橫坐以關說公
事串入周順昌高攀龍周宗建李應昇繆昌期黃尊素而一網之
緹騎四出械繫相續概送鎮撫司而許顯純操其生殺之權矣李
實構於外李永貞織於內顯純下此辣手卽舉三凶立磔於西市
未足償七臣之命也

上既命磔魏忠賢客氏斬崔呈秀卽命定附逆諸臣罪給事中李
覺斯疏參忠賢有十孩兒五虎五彪奉旨法司會議具奏虎爲吳
淳夫李夔龍田吉倪文煥其一則霍維華也維華廣布神通遂以
已死之崔呈秀代之彪爲田爾畊許顯純崔應元楊寰孫雲鶴時
刑部尙書蘇茂相左都御史曹思誠大理寺署事少卿姚士慎皆
與璫黨者香火情深曲加護持引職司受財枉法律發附近衛所
充軍終身倪文煥追贓五千兩吳淳夫三千兩李夔龍田吉各一
千兩解助邊餉田爾畊許顯純引職官故勘平人因而致死律斬
監候處決崔應元楊寰孫雲鶴引同僚官知情共勘減等發邊衛
充軍讞上輿論不平甚惟時劉志選梁夢環以誣論張國紀傾搖
國母辭貞以枉殺劉鐸皆相繼論列逮問而內外蒙徇起解無期
給事中曹思稷疏言虎彪爲逆璫心腹同惡相濟按以交結之律
監有首從之殊乃牽引尋常貪酷職官律例巧爲諸奸出脫其監
候必於原籍充軍必於附近物議沸騰豈曰無因今劉志選梁夢

環李永貞並奉旨提問竊恐法司復祖前人故智以護虎彪者護
諸奸也御史吳煥疏言昔年被禍諸臣朝聞命而夕就道至不敢
入與妻孥訣今虎彪諸奸雖屢奉明旨而詔書挂壁優游任意如
劉志選梁夢環曹欽程輩或燕處家園或潛藏京邸奧援有靈朝
廷無法辭貞以堂堂司寇爲逆璫劄于抗不赴逮公然疏辨蔑法
甚矣於是再奉嚴旨勒限嚴催起解云時新咨科道考選命下彈
擊魏黨無虛日璫所拔用之大僚黃立極周應秋郭允厚孫杰陳
九疇阮大鍼呂純如等咸次第撤回虎彪與諸奸始得逮問正法
次年遂定逆案頒行天下
吏部疏題贈卹死事諸臣高攀龍兵部尙書後加贈太楊漣右都
御史加贈太左光斗右副都御史加贈太周起元兵部侍郎周順
昌魏大中俱太常寺卿李應昇周宗建黃尊素袁化中吳裕中夏
之令俱太僕寺卿周朝瑞大理寺卿繆昌期正詹事萬燝光祿寺
卿各廕一子入監讀書照品級賜祭葬丁乾學侍讀學士顧大章

劉鐸太僕寺少卿張汝刑部員外郎俱賜祭葬奉旨高攀龍等守
正捐生忠魂久鬱既經分別贈賡准如議行以昭朕顯忠勵世之
意

以熹廟梓宮發引廷試進士改於四月初二日上畱心策士是日
顯天所得真才又將進呈三十六卷並貯金甌中以金筯夾之首
得劉若宰遂定爲狀元

按弘治乙丑科廷試進士孝宗皇帝亦焚香籲天於後宮是科
所得名臣惟顧鼎臣崔銑黃鞏魏校四人以文章品望著方獻
夫以議大禮顯嚴嵩以貪奸敗今戊辰科所得如汪偉金鉉王
章吳甘來周鳳翔徐沂李夢辰胡守恆史可法金聲劉之綸徐
澤皆以死節著似勝於弘治矣而是科亦有宋企郊以首先降
闖賊聞其他失節敗類者亦尙有人也是科以登極恩中進士
三百五十人房考二十人科臣有帶副都銜者在逆璫亂政時
所加然序列仍在翰林編簡後

三朝要典一書乃逆黨顧秉謙崔呈秀馮銓等迎合魏璫意借題
以入諸正人罪者也其所指罪魁紅丸則以孫慎行爲首移宮則
以楊漣爲首挺擊則以王之寀爲首當日名賢一網俱盡至是倪
元璐請毀之疏云挺擊紅丸移宮三案關於清流要典一書成於
逆豎其義不可不兼行其書不可不速毀蓋當事起議興盈廷互
訟爭挺擊者方護東官爭瘋顛者計安神祖主紅丸者仗義之言
爭紅丸者原心之論主移宮者弭變於幾先爭移宮者持平於事
後各有其是不可偏非旣而楊漣二十四罪之疏發魏廣微此輩
門戶之說輿於是逆璫殺人則借三案羣小求富貴則借三案經
此二借而三案之面目全非矣故凡推慈歸孝於先皇卽其頌德
稱功於義父網已密而猶疑有遺鱗勢極重而或憂其翻局於是
諸奸始創立私編標題要典以之批根今日則眾正之黨碑以之
免死他年卽上公之鐵券由此而觀三案者天下之公論要典者
魏氏之私書夫以閹寺之權屈役史臣之筆亙古未聞當毀一未

易代而有編年不直書而加論斷若云彷彿明倫大典則是魏忠賢欲與肅皇帝爭聖崔呈秀可與張孚敬比賢悖逆非倫當毀二矯誣先帝偽撰宸篇假竊誣妄當毀三又況史局將開館鈔具備七載非難稽之世實錄有本等之書何事畱此駢枝供人唾罵當毀四奏入上卽欲將要典焚燬內閣來宗道擬旨這所奏關係重大著禮部會同史館諸臣詳議具奏御筆於具奏下增聽朕獨斷行五字既而衆議僉同奉旨卽行焚燬矣侍講孫之獬詣東閣力爭不可毀繼以痛哭復上疏極言不可毀之故於是張承詔吳煥吳玉等連疏參之獬語皆絕快而蕭山輩居中極力調護僅票旨回籍至次年定入逆案中

朱文肅曰甚哉小人之意自供罪案又代爲他人發揚盛美也要典一書先列爭者之疏附以史斷曲詆妄言無所不至然後附以駁者之疏其人則楊維垣趙興邦徐大化劉志選崔呈秀也由今而觀五人之肉足食乎骨之臭可洗乎前之爭者或死

或廢其疏稿未必盡存其子孫未必一一搜集而要典收之略盡借天子威靈既藏內府又徧散民間未幾內府燬而散者不可收人皆得而見之于爭者無不歎賞于駁者無不唾罵而史臣數語段段可羞可恨穢莫加焉罪孰甚焉天奪其魄自投穢廁中沒頂而不可拔也五人既坐大誅其二又搜大戮此外又如劉廷元岳駿聲霍維華才皆有爲皆入其中吾惜逆賊既害多少善人又累多少才人故立身者不可不慎總之功名之念淡則思過半矣

按文肅此論暢矣然似微爲劉霍致惜者亦知倡瘋顛二字以護挺擊者廷元也首開通內之徑陰導逆璫戕善類者維華也卽謂之才亦小人之才耳何足言

御史毛羽健疏參阮大鍼先後舉主前則五虎之倪文煥後則十孫之長李魯生非黨邪確證乎甲子歲營吏垣之長恨趙南星不與而與魏大中遂拜忠賢爲義父而南星戍死大中慘殺非害正

確證乎若通算一疏力詆左光斗極罵周嘉謨等臣言過慙一疏復力薦之非陽附正人以掩其黨邪害良之確證乎至屈指待皇祖鼎湖一語此何事而今日屈一指明日屈一指以待皇祖之龍升非大逆不道乎初大鍼以附璫升光祿卿見璫敗因上合算七年通內諸臣一疏以惠世揚弟汪文言通王安并及諸人冀掩其詔附之醜至是被劾即奉阮大鍼前後反覆陰陽閃爍著閒住之旨蓋長山所票也大鍼因恨長山遂私通內庭暗布蜚語以搆之不久即得罪去

御史任贊化吳玉鄒毓祚鄧英毛羽健等連疏參楊維垣把持朝政黨邪害正諸罪已奉下部議處斥革矣至是而原任尚寶卿黃正賓上除惡務本疏略云結交內侍明律森嚴乃虎彪肆行而子孫蟪集究其爲作俑者魏廣微發縱指示者徐大化也大化始以攻熊廷弼爲媚璫贖見既而逢迎廣微以擔當其謀富貴某宜戍某宜削一一疏記與廣微使大肆其排擠之毒手夤緣督理大工

日奉魏忠賢色笑剋減工銀無算最後私受銅商厚賄那借惜薪司錢糧二十萬兩拂忠賢之意罷令閒住及睹逆局將敗令表姪楊維垣疏參崔呈秀爲翻身轉局地目今大化維垣雖奉譴斥潛居輦轂日與閣臣往來世界翻雲覆雨已三轉於大化之綫索何叵測也時蕭山票旨有不必苛求句御批楊維垣不許潛住京師徐大化著回原籍去

先忠毅與周宗建輩七公之逮也由於織監李實之疏李實已逮問大辟矣一日上召對時宣刑部署部侍郎丁啟睿問曰李實一案有疑惑無疑惑有暗昧無暗昧啟睿對九卿科道會問據實回奏上曰李實何以當決不待時啟睿對實與李永貞構殺七命不刑自招上曰豈有不刑自招之理因問吏部尚書王永光永光對李實初亦不肯承及用刑然後承認上曰重刑之下何求不得李實爲魏忠賢追取印信空本令李永貞填寫如何含糊定罪啟睿對威福出于朝廷一憑聖裁上曰持法要平朕豈爲李實五虎五

彪緣何不問他決不待時後一日召對上特攜李實原疏示閣臣曰此李實參七臣原疏也卿等可詳細看是硃在墨上墨在硃上諸臣羣覽久之俱對以果是墨在硃上上曰可見是空頭本復命傳諭九卿科道遞閱畢於是宣閣臣改票李永貞決不待時劉若愚次一等李實又次一等

按李實空印本是矣安知非實預為後日卸罪地故作此先硃後墨之伎倆耶時為實齋奏者司房孫升何不即提之詰問窮究到底耶又何不取實平日入奏之本較對筆跡異同耶縱云填寫出於永貞次一等足矣何至又次一等也王永光俯順上意小人故態不必言了啟睿身列司寇不能執法廷爭乃以威福出於朝廷一語卸責閣部科道又俱無一言糾正此廷臣所以見輕也明主可以理格時遜之尚在童年同難諸子亦無一人在京執奏者使冤對未償大法未正痛哉至虎彪何以不問決不待時天語琅琅諸臣置面顏于何地當時讞此案為司寇

蘇茂相竊謂其罪不減虎彪也厥後三法司會審虎彪諸奸始正大辟者主稿屬掌道蔣公允儀筆始無失刑矣

李永貞在忠賢名下用事三年十月升玉帶隨堂秉筆賜坐蟒橈枕而月五遷皆由逆賢心腹掌班劉榮所薦凡賊害諸人造謀實由外廷綫索永貞即非助逆殺人之入然其心地可概見也七年八月上即位告病未允至九月初七日始准辭十月初二即自砌于私宅小院穴牆以通飲食二十六日聞逆賢允辭始出牆見人蓋初求退原欲與徐應元合成一局攢退逆賢從新另做世界至應元亦退永貞始手忙腳亂密託心腹掌班丁紹呂等饋王體乾王永祚王文政每人銀五萬兩三人畏永貞反覆憚上英明都不敢收十一月十七日各進獻御前是日晚永貞不自安密具鞍馬逃走二十六日奉旨降淨軍發承天顯陵安置舉家驚惶無覓處至十二月初九日永貞外宅得報信人持永貞親筆帖取盤費即拏獲奏聞著押赴顯陵二月又調

發鳳陽三月以御史劉重慶疏參提解赴京六月二十日會審引奸邪進讒言佐使殺人律斬決不待時二十七日召對云李實空本永貞填寫驗是墨壓硃上遂於十六日縛赴正義街斬訖

御史吳煥疏參漕運太監崔文昇引進李可灼漫投寒藥以致光廟賓天實坐不赦之條而甘爲逆賢心腹總督漕運控扼江淮要害與劉志選虎踞南北遙爲聲援貪污慘刻人人切齒文昇在淮尤爲縱肆剝軍虐民應行逮問疏入文昇拉同伴伏宮門哭聲達帝座上立拏首倡二豎同文昇各杖一百俱降淨軍發往孝陵煥疏遂畱中

應天巡撫李待問疏爲地方死難諸臣高攀龍左光斗繆昌期周順昌李應昇周宗建顧大章請建祠尸祝言諸臣生平各有本末礪樹咸著朝端揆厥致禍非擊魏逆之奸萌卽褫崔賊之貪魄不然觸兇抗忌構端以陷之者也彼時虐燄四張羣兇羅織殞身破

家之慘無不爲之號霜泣旱冤憤實有同情此時天日重開褒爵賜廕之恩無不幸其潤枯噓稿昭揭尤有同志此各府士民相繼以尸祝請也乞下該部具覆特允本地建祠崇祀庶忠魂大慰泉臺直節永光來禩奉旨郡邑鄉賢祠原以俎豆示風勸近來濫入太多褻越巨典殊非舊制這慘死諸臣風節較著著有司遵旨送祀使士子曉然知忠孝之義不必建祠

擬此旨者次輔吳江周道登也實欲阻鄉人之建祠故以送祀鄉賢爲詞試觀當時縉紳卽庸碌致位考終牖下者何一不入賢祠且入賢祠止須地方官批行何必奉旨哉聞之前輩云吳江本與瑞黨臭味頗伎嫉諸正人憎及死骨故不喜同鄉有此盛事也後經臺臣王道直劉士禎論列亦指及此可見公論有在矣故瞿公稼軒是時柬先祖父有云朝政日見清明邪黨尙守瑞局如聖慮皇皇求舊彼必肆力擠排皇衷懇懇恤冤彼必痛加沈抑有君無臣直使人扼腕太息耳噫向非聖主獨斷卽

一切卹典亦安能如此之優渥哉

御史黃宗昌疏言逆璫竊柄陰謀叵測皆由懷祿固寵輩當先逢迎有以生其矯竊問鼎之漸如寧錦報捷不過解圍自去乃命爵論賞卽一毫無與者皆升官廕子濫至百餘人國家名器盡爲逆奄收買心腹之物此距先帝升遐時尙有旬日或矯或否半屬疑端至三殿不日之成一敘尤亙古所無先帝賓天在八月二十二日敘功行賞在二十一日先帝久已不豫此正大漸之時豈有安閒出詔之理不聞此時召我皇上付託大寶顧命大臣申諭國事乃以不要緊之事爲大顧命乎蓋逆賢此時雄心正熱故預先竊命巧結腹心此皆魏氏官非皇上官也今日猶帶僞官立堂堂之朝亦良心盡喪矣奉旨宗昌知矯僞有人不妨指名奏來宗昌因復疏言臣只糾其事不能盡憶其人使查邸報列名直指之因舉黃克纘霍維華邵輔忠呂純如等六十人以對大約先帝上仙之日卽諸臣謝恩之日揚揚得意以假爲真總之皆所稱僞官也於

是奉旨下部查核凡殿功邊功所加恩典一概削除不敘而爵賞始一清矣

戶科韓一良疏言皇帝平臺召對有文臣不愛錢之語然今世何處非用錢之地何官非愛錢之人向以錢進安得不以錢償臣起縣令居言路以官言之則縣令爲行賄之首給事乃納賄之魁今咎守令之不廉然守令亦安得廉俸薪幾何上司督取旣多過客動有書儀至考選朝覲動費四五千金此金非從天降非從地出而欲令守令之不愛錢乎至於科道人號爲抹布言只要他人淨不管自己污也臣兩月來辭卻書帕五百餘金臣寡交猶然餘可知矣此猶爲有名之饋臣則懼其以皇上之言路爲嚇人之腐鼠若操一二愛錢之心則流水至矣乞大爲懲創使諸臣視錢爲汗懼錢爲禍庶不愛錢之風可觀至開之有原導之有流猶未敢深言也疏入上嘉之因召對出此疏命一良高聲朗誦畢付閣臣互閱劉鴻訓奏這弊有兩端有交際有納賄上問曰何謂交際鴻訓

奏交際如親友饋遺情有可原納賄則希榮求寵便不可以數計
上曰一良所奏大破情面忠鯁可嘉諭吏部破格擢用吏部尙書
王永光奏曰科臣露章必有所指乞令指出一二重處以爲貪官
戒上召一良指疏中開之有源導之有流等語可據實具奏一良
對臣今未敢深言待插遼平復後具奏上又令指名一良曰此二
語蓋指事例言若納賄等事臣疏中原說風聞上怒曰難道一人
不知遽有此疏限五日內指名來一良回奏參周應秋閻鳴泰張
翼明褚太初上又召一良面詰曰周應秋等自有公論張翼明已
下部議何待爾參復取前疏反覆展視御音朗誦至此金非從天
降及辭卻五百餘金一段擊節歎賞聲厲臣鄰問一良此五百金
何人所饋一良對臣有交際簿在上固問終以風聞對上遂震怒
卽諭閣臣曰韓一良所奏前後矛盾前疏明明有人今乃以周應
秋等塞責劉鴻訓等合詞奏請再三上愠曰都御史不是輕易授
的要實功鴻訓再奏曰臣不爲皇上惜此官但爲皇上惜此一

言上曰分明替他說話豈有紙上說一說便與他一箇都御史復
召一良面叱曰所奏前後矛盾顯是肺腸大換本當拏問姑饒這
遭

盜錦督師缺廷推袁崇煥赴任陛辭上召問曰封疆淪陷遼民塗
炭卿萬里赴召忠勇可嘉所有方略可具實奏聞崇煥奏所有方
略已具疏中臣受皇上特恩願假以便宜計五年而東可平遼可
復上曰五年滅口便是方略朕不吝封侯之賞卿其努力以解天
下倒懸之苦卿子孫亦受其福崇煥謝恩暫退時上亦暫憩便殿
給事中許譽卿面叩五年之略崇煥言聊慰上意耳譽卿言上英
明豈可浪對異日按期貢功奈何崇煥自覺失言頃之上再御便
殿崇煥卽奏東口四十年蓄聚此局原不易結但皇上畱心封疆
宵旰於上臣何忍言難此五年中須事事應手首先錢糧上卽召
戶部署事王家楨令竭力措辦毋致不充於用崇煥又請器械凡
解邊弓甲等項必須精利上卽諭工部署事張維樞所解各項須

鑄定監造司官及匠作姓名有不堪者核查究治崇煥又奏五年之中事變不一必須更兵二部俱應臣手所當用之人卽爲選授不當用者勿爲濫推上卽召吏部尙書王永光兵部尙書王在晉諭以崇煥意崇煥又奏以臣之力制全遼而有餘調眾口而不足一出國門便成萬里忌功嫉能夫豈無人卽凜凜於皇上法度不以權掣臣之肘亦能以意亂臣之方略上起立竚聽久之尋諭曰卿條奏井井不必謙退朕自有主持閣臣劉鴻訓等俱奏請假崇煥便宜賜之尙方至如王之臣滿桂之尙方應行撤回以一事權上然之遂命傳示該部遵行

王象乾以原官起用總督宣大陸見上召同閣臣俱入檻內去御案咫尺益異數也上曰卿三朝元老忠猷素著見卿鬢鑠知袁崇煥薦舉不差有何方略可面奏來象乾奏臣年踰八旬齒疏不能詳奏所有方略具在疏中上固問之象乾先言插漢卜哈諸酋離合始末因奏朵顏等三十六家今日應當與哈慎等一同連絡可得數萬安插薊鎮沿邊駐牧爲我藩籬似亦可以敵口上曰觀插意似不肯受撫者象乾奏從容籠絡撫亦可成上曰禦夷當恩威兼濟不可專恃羈縻閣臣劉鴻訓奏聞插酋知王象乾至退去六百餘里上卽問退去在何地方鴻訓不能對象乾代奏退去直北沙磧中上又問儻款事不成如何象乾密奏虜情數百言上始色喜諭曰卿雖年逾八旬精力尙壯卿撫插於西袁崇煥禦口於東恢復功成皆卿等之力也百官俱叩首退

按崇煥原知邊事難爲冀以款羈縻歲月故舉象乾專主撫也象乾旣赴任專任插酋撫賞事宜舊例屬夷出馬中國出綵繒互相貿易名曰馬市虜中駒初生繫其母於山頂駒從下一躍而上者畱充馳驅躍至半而蹄者殺以爲食懦不能躍者則以與中國布象乾建議彼旣以驚馬相欺不若卻其馬以價之半與之少司馬申用懋謂所市馬誠不堪用然每歲徵馬以萬計於彼不無少損且以幣易馬尙爲有名若無故斂幣與之去歲

幣幾何又插索數甚奢若遽損其數彼未必聽命塞外舊棄地甚多盍以泰寧等地爲請能歸我舊疆我當如所索不能然後減損其數則我爲有辭矣時象乾年毫無遠圖當事俱急欲成功苟且從事不半年而內犯闖入大同殺戮甚慘撫卒不成浪擲金錢幾十萬云

袁崇煥甫至錦州卽連疏請餉上御文華殿召諸臣諭曰前崇煥云安插錦州兵變可弭今又云欲鼓譟求發內帑與前疏何相矛盾卿等奏來時諸臣有請允發者上詰問戶部尙書畢自嚴自嚴極言戶部闕乏容當陸續措給上曰據崇煥疏云至初三日卽變今已初二日卽發去已遲何救於鼓譟又曰內帑外庫俱係萬民脂膏原用以保封疆安社稷若發去實實有用朕豈吝此且委實不足有人盜去卿等那得知禮部侍郎周延儒奏國家最忌關門昔防口變今又防兵變前盜遠鼓譟未曾處置今又因鼓譟發帑儻各邊效尤將何底止上曰卿以爲何如延儒奏臣非敢阻皇上

發帑此時安危在呼吸閒固當與之然非常策須還畫一經久之計上曰此說良是若事急專一請發內帑內帑豈不涸之源何以應之上又曰爾等不肯大破情面極力擔當動稱邊餉缺乏每下旨通不見解來卽如賊銀充餉至今不到頭解行查亦不回奏如此稽遲錢糧何時得足又曰你們每每求舉行召對文華商推猶然事事如故將召對都成舊套商推俱爲空文何曾做得一件實事又曰朕卽位以來孜孜求治以爲卿等當有嘉謨奇策召對商推未及周知者悉爲朕告乃推諉不知朕又何從知之時天威震迅憂形於色諸臣皆戰懼稽首而退時元年十月初二日也越數日復召對諭缺餉事須講求長策遼兵動輒鼓譟各邊效尤將何底止延儒奏軍士要挾畢竟別有隱情古人還有羅雀掘鼠軍心不變的今各兵只少他折色銀兩如何動輒鼓譟上曰正是如此古人還有羅雀掘鼠軍心不變的今雖缺餉豈遂至此延儒又奏安知非不肖將官造出恐嚇言語搖惑軍心上稱善者再自此兩

崇禎朝事一
番召對而延儒遂簡在帝心矣

插入犯大同總兵渠家禎閉門不出任其殺掠上召百官諭云朝廷養士費許多兵餉一旦有警便束手無策只曉得請兵請餉又曰插酋殺戮人民巡撫不能防禦是功是罪止仗一懶麻僧講款不令輕中國耶又曰邊疆失事只參總兵等官難道敘功不升文官朦朧偏護朕甚惡之後家禎疏至上示閣臣俱言大同失事家禎擁兵坐視豈能逃罪上曰督撫如何令千餘兵馬便要去敵插十萬餘衆渠家禎既有罪督撫作何事劉鴻訓奏武臣在外調兵文臣在內調度上曰文臣還當節制武臣而今督撫一向不行操練平日虛冒臨敵張皇以千餘弱軍抵十萬強敵如何抵得鴻訓奏皇上責備文臣極是但自皇祖靜攝以來至先帝時已二十年邊備廢弛已久一時猝難整頓上曰而今何如輔臣等俱奏而今比前大不相同上曰此皆是贊揚之辭尙未見行一實事如何便見大不相同諸臣默無以對又一日御講筵問閣臣曰宰相須用

讀書人當作何解周道登對曰容臣等到閣中查明回奏上始有愠色既而微哂之又問近來諸臣本內多有情面二字何謂情面道登對曰情面者面情之謂也左右皆爲匿笑噫有君無臣之概已於此數事見之矣

工科黃承昊奏言東南時患水災因水利不修上問水利爲何不修閣臣錢龍錫周道登同奏水利是東南第一大事但修理要錢糧前已擬旨著撫按酌議上沈思久之曰要修水利可擾民否龍錫奏臣等惟恐擾民故行撫按酌議

御史毛羽健疏請蘇驛遞上卽令羽健自讀因諭閣臣曰驛遞疲困已極小民敲膏吸髓馬不息蹏人不息肩朕甚恨之若不痛革民困何由得蘇卿等卽擬票來及票至上以內有撫按司道公務外俱不許遣白牌語屬含糊命改票

御史梁子璠請汰兵清餉內有邊臣虛冒等語上召戶兵二部問何冒濫至此戶部署事王家楨兵部尙書王在晉奏兵餉濫冒已

久各邊有事督撫屢次請添兵餉情弊已非一日又讀至老弱之人曾荷戈而勿克上矍然曰荷戈皆老弱如何不查隨敕戶兵二部差廉幹司官挨年挨月查核具奏

又一日召對特召科道官至前諭曰朕思進賢退不肖故令爾等爲耳目司舉劾就中不無濫冒爾等試一思之所舉者果人人皆賢所劾者果人人皆不肖乎朕特降諭切責有反坐二字以求直言今又面諭爾等又鉗口不言要科道官何用蓋上孜孜求治朝夕靡寧竟無一人能仰慰聖意者至蘇驛遞清兵餉尤屬救時良策而奉行不善反以開流寇之禍悲夫

召御史吳玉讀所劾樞臣王在晉疏至在晉何如人也命高聲讀至公子親家等語上問親家姓名又問疏中壘斷字面玉曰壘斷是市人登高處望左右而取利之意又讀至時局等語上問何爲時局玉曰卽當時是魏忠賢的局面今日是皇上的局面上怒曰如何以他比朕又讀至妄自矜詡等語上問輔臣何如李標奏在

晉屢被人言宜放他去上曰事事有箇是非如何只教他去便了又問張慶臻一事如何改敕閣臣奏先見兵部手本慶臻揭帖在後上問慶臻如何敢送私揭慶臻奏以小事不敢瀆奏上曰改敕如何是小事又令諸臣及科道官奏王道直等俱云慶臻用賄改敕是實吳玉又奏劉鴻訓主使慶臻奏改敕是申書臣只多了一揭上怒其妄辨叱之因以擅改敕書罪十九卿科道會議議上奉旨劉鴻訓擅增敕書欺君說謊發邊衛充軍王在晉徇私受屬并司官苗思順俱革職張慶臻行賄鑽營念係勳臣罰俸三年中書田佳璧等法司定罪其吳玉王道直等參劾有據各加一級先是慶臻奉命提督京營敕內增有兼管捕營四字提督鄭其心以侵職掌論之上命查寫敕中書官因追究賄改緣由云

命會推閣臣以成基命錢謙益鄭以偉孫慎行李騰芳何如寵辭三省盛以弘羅喻義九人名上溫體仁憤其不得與也因疏許錢謙益於辛酉科主試浙江賄中錢千秋不宜與推上召廷臣面問

體仁謙益辨良久上問體仁所稱神奸結黨者誰體仁奏謙益之
黨甚多臣不敢盡言至此番枚上俱是謙益主持吏科章允儒奏
錢千秋一事已經問結體仁資雖深望甚輕因會推不與遂爾熱
中如糾謙益何不糾於未推之先體仁奏科臣此言正見其黨蓋
前猶冷局參他何用糾於此時正為皇上慎用人耳允儒奏從來
小人陷君子皆以黨之一字當日魏廣微欲逐趙南星等於會推
疏中使魏忠賢加一黨字盡行削奪至今為小人害君子之榜樣
上怒叱曰胡說御前奏事恁這樣胡扯拏了錦衣衛將允儒扶出
體仁又奏皇上試問冢臣王永光屢奉溫旨何以不出瞿式耜有
言直待完了枚上然後聽其去皇上方眷注冢臣如何命他去又
奏謙益熱中枚上先是使梁子璠上疏令侍郎張鳳翔代行會推
此從來未有之事上召諸臣問曰枚上大典會推要公如何推這
樣人是公不是公諸臣奏來閣臣李標等俱奏關節與謙益無干
前已招問明白上曰招也極閃爍不可憑據禮部侍郎周延儒奏

皇上再三下問諸臣不敢奏者一則懼于天威一則牽於情面總
之錢千秋一案關節是真不必又問上又詰問曰九卿科道會推
便推這樣人就是會議今後要公不公不如不會議卿等如何不
奏延儒又奏大凡會議會推明旨下九卿科道以為極公不知外
廷只是一二人把持定了諸臣多不敢開口就開口也不行徒然
言出禍隨上命再奏延儒復奏如前上曰朕問卿等別無言答應
何貴召對因目視延儒曰適二班官中只這官奏了數句又謂輔
臣曰諸臣如此反不如歌功頌德之時邊防也完固財用也充裕
今枚上且暫停時謙益伏地待罪命出外候旨次日奉旨錢謙益
關節有據又濫與枚上有黨可知著革職回籍錢千秋法司提問
又旨章允儒徇私滅公肆言無忌革職為民耿志煒梁子璠罰俸
一年瞿式耜房可壯降級調外
先是兩次召對上以宜興奏語稱旨已心屬之適當枚上同鄉
恐兩人不能並相因力阻宜興宜興不堪也許公霞城欲為兩

解之商之掌垣章公章亦唯唯再過虞山寓則瞿公稼軒在坐執意堅拒且以擁戴宜興譏許公矣虞山且云彼與涿州相知非吾臭味若推宜興可不推我許公遂不置喙宜興見絕之已甚因與烏程合謀烏程既出疏忽蒙召對虞山猶不知以爲拜相定於此日揚揚得意及入對方知有疏兩人廷辨烏程言如涌泉虞山出於不意言頗屈科道諸臣又多爲虞山左袒者於是黨同之疑中於上意不可解矣

宜興雖與涿州同年相好當涿州附奄拜相時宜興正居憂在籍未嘗附之升官也丙寅之獄諸賢以忤璫被難者宜興皆力爲揀援貽書涿州規以大義一時同志皆稱之不獨遜之一人之私也乃虞山輩獨絕之已甚激成一番水火反使烏程得志惜哉

御史毛九華糾溫體仁逆祠獻媚詩冊任贊化參體仁居鄉不法諸事上復召對命宣九華疏以問體仁體仁奏若有獻媚璫祠詩

必手書爲贄無木刻之理既刻流傳廣布豈有九華獨得之途中京師反無刻冊且何不發於籍沒逆璫之時而待於九華之奏若以刻本爲據則刻匠徧滿都中以錢謙益之力何所不可假捏上如言詰九華九華對臣八月買自途中上曰八月買的如何纔發九華對臣十月考選上問閣臣如何說首輔韓爌奏體仁平日硜硜自守亦有品望止以參論枚十一疏忿激過當致犯衆怒上展冊指後四人俱杭州人定是此四人所爲只問此四人便知又召翰林官宣讀任贊化疏問溫體仁體仁奏臣之居鄉惟知奉公守法贊化不參臣居官之事而參臣居鄉之事以爲誣臣居官之事懼皇上召問廷臣欺罔立見故誣以居鄉之事以爲道里遙遠耳目易眩因參贊化爲錢謙益死黨代謙益首攻陳以瑞以瑞係逆璫削奪皇上賜還因曾參謙益科場之事贊化反以媚璫糾之把持銓部覆之爲民又贊化相才一疏稱謙益爲伊周班行此皆爲謙益死黨之證上曰不必多說自此體仁偏以孤忠見知於上而

結黨之說深起聖疑攻者愈力而聖疑愈深矣
御史吳姓疏言舊制六年京察爲諸臣不修職業者設若大奸大
惡附逆害人者亦在此例如劉瑾之敗一時附瑾用事者或誅或
戍或削或降皆不待京察以此輩罪天人多考功法所不載也忠
賢之兇惡倍於瑾附忠賢之罪惡亦甚於附瑾之徒大略有四如
動搖國母逼封三王虎彪義子上公封爵名曰佐逆借題殺人屠
戮忠良門戶封疆一網打盡名曰害正稱功頌德聚斂建祠薦引
邪類要典詆誣名曰媚璫賄通權奸入幕密謀矯加職銜一歲九
遷名曰速化此皆不知有朝廷唾罵由人廉恥盡喪務須澈底澄
清新斷根株若混入察典則名目不分額數有限挂一漏萬何以
示懲奉俞旨下部未幾遂奉特諭有逆案之定實自此疏啟之御
史侯恂亦有疏言除奸察吏不可並行語俱暢快
大計京朝官南京吏部尚書鄭三俊右都御史陳于廷公疏於察
典外舉南京媚璫之人二十人大理寺謝啟光科郭如闡御史

何早李時馨夏敬臣劉漢徐復陽戶部魏豸胡芳桂張聚垣禮部
虞大復頡鵬葉天陞兵部周宇李際明邱存性工部魏弘政葛大
同歐陽充材應天府夏之鼎或甘心附逆或懼禍中變律以順逆
之理一無可貸據實奏聞奉俞旨下部此亦在未奉諭定逆案之
前也

上御平臺召閣臣韓爌錢龍錫李標吏部王永光左都曹于汴命
定附逆諸臣罪閣臣先僅以四五十人列案以請上大不然再令
廣搜又益以數十人上怒其不稱旨且曰此輩皆當依律法治罪
諸臣以未習刑名對乃召刑部尚書喬允升同事又問張瑞圖來
宗道何以不入對曰二臣無事實上曰瑞圖以善書爲逆璫書祠
額碑文宗道題崔呈秀母卹典稱在天之靈其罪更重又問賈繼
春何亦不入閣臣對繼春言善待選侍不失厚道後雖反覆其持
論亦有可取上曰惟反覆故爲眞小人於是復將御前祠頌紅本
發下令據實定罪分別擁戴詔附建祠稱頌贊導諸款首冠以大

逆魏忠賢客氏令刊布中外吏部都察院接出聖諭朕惟帝王憲
天出治首辨忠邪臣子致身事君先明逆順經凜人臣無將之戒
律嚴近侍交結之條邦有常刑法罔攸赦逆豎魏忠賢猥狡不才
備員給使傾回巧智黨藉保阿初不過窺噏笑以伺陰陽席寵靈
而饗富貴使庶位莫假其羽翼何蠢爾得肆其毒痛乃一時外廷
朋奸誤國實繁有徒或締好宗盟或呈身入幕或陰謀指授肆羅
織以屠善良或祕策合圖扼利權而管兵柄甚至廣興祠頌明效
首功倡和已極於三封稱謂侵擬於無等誰成逆節致長燎原及
朕大寶嗣登嚴綸屢霈元光逆孽次第芟除尚有飾罪邀功倒身
竄正以望氣占風之面目誇發奸指佞之封章跡其矯誣烏容錯
貸朕鑒察既審特命內閣部院大臣將發下祠頌紅本參以先後
論劾奏章臚列擁戴詔附建祠稱頌贊導諸款據律推情再三訂
擬首正奸逆之案麗於五刑稍寬脅從之誅及茲三禡其情罪輕
減者另疏處分姑開一面此外原心宥過縱有漏遺亦赦不究自

今懲治之後爾大小臣工宜洗滌肺腸恪遵職業共遵王路悉斬
葛藤無曠官守而假事講張無急恩仇而借題糾舉朕執是非以
衡論奏程功實以課官方有一於斯必罪不宥尙各懲毖乃亦有
終欽哉故諭

一首逆 魏忠賢 客氏 依謀大逆律不分首從皆凌遲處死

已經正法

一首逆同謀 崔呈秀 李永貞 李朝欽 魏良卿 侯國興

劉若愚 依謀大逆但其謀者不分首從皆凌遲處死律減

等擬斬

一交結近侍 劉志選 梁夢環 倪文煥 田吉 劉詔

孫如列 許志吉 薛貞 曹欽程 吳淳夫 李夔龍

陸萬齡 李承祚 田爾畊 許顯純 崔應元 張體乾

孫雲鶴 楊寰 以上依諸衙門官吏與內官互相交結

泄漏事情夤緣作弊扶同奏啟律斬秋後處決

一交結近侍次等

閻鳴泰 周應秋 李魯生 楊維垣 潘汝楨 郭欽

李三才 以上依交結近侍官員律減等充軍仍行各撫按

照擬有贓私情節一併查明奏請發落

一逆孽軍犯

魏志德 魏良棟 魏鵬翼 魏撫民 魏希孔

魏希堯 魏希舜 魏希孟 魏鵬程 傅應星 楊六奇

客光先 徐應元 劉應坤 王朝輔 涂文輔 孫暹

王國泰 石雅元 趙秉彝 高欽 王朝用 葛九思

司雲禮 陶文 紀用 李應江 胡明佐

一交結近侍又次等

郭允厚 薛鳳翔 李蕃 孫杰 張我續 朱童蒙

楊夢袞 李春茂 李春燧 王紹徽 徐兆魁 劉廷元

謝啟光 徐紹吉 邵輔忠 楊所修 賈繼春 范濟世

李養德 阮大鍼 姚宗文 陳九疇 元詩教 趙興邦

傅一樞 安大伸 孫國楨 郭鞏 馮嘉會 曹思誠

孟紹虞 張樸 李恆茂 郭尙友 李精白 秦士文

卓邁 陳爾翼 石三畏 郭曉治 張文熙 盧承欽

何廷樞 陳朝輔 許宗禮 劉徽 楊維和 何宗聖

王珙 汪若極 陳維新 智鋌 游鳳翔 田景新

呂純如 吳殿邦 門克新 李從心 楊邦憲 郭增光

單明翽 黃運泰 李嵩 牟志夔 張三傑 曹爾楨

王點 張文郁 周維持 徐復陽 黃憲卿 毛一鷺

張養素 汪裕 梁克順 劉弘光 許其孝 鮑奇謨

陳以瑞 莊謙 龔萃肅 溫皋謨 李應荐 何可及

李時馨 劉漢 王大年 徐合中 徐吉 宋禎漢

張汝懋 許可徵 劉述祖 李燦然 劉之待 孫之獬

吳光嘉 季寓庸 潘士聞 王應泰 張元芳 阮鼎鉉

李若琳 張永祚 周良才 曾國禎 張化愚 李桂芳

受賞月已年一

三

張一經	陳殷	夏敬承	周宇	魏豸	郭希禹
顏鵬	李際明	魏弘政	岳駿聲	郭士望	張聚垣
周鏘	徐四岳	辛思齊	胡芳桂	以上依結交近侍	
官員律引名例律減三等坐徒三年納贖為民					
一詔附擁戴	李實	李希哲	胡良輔	崔文昇	李明道
劉敬	徐進	馮玉	楊朝	胡賓	孟進寶
劉鎮	王體乾	梁棟	張守成	高承德	以上一
款十六人并前一款	徐應元等	十六人俱為民當差			
又疏列次等四十四人	黃立極	施鳳來	楊景宸	房壯麗	
董可威	李思誠	王之臣	胡廷宴	張九德	馮元三
喬應甲	楊維新	朱國盛	馮時行	呂鵬雲	董懋中
周昌晉	虞廷陞	楊春茂	徐景濂	陳保泰	郭興言
周維京	徐揚光	陳序	曹谷	朱慎鋈	郭如閻
何早	虞大復	葉天陞	邱存性	葛大同	夏之鼎

張九賢 李宜培 譚謙益 歐陽充材 吳士儁 徐溶
 潘舜厯 李三楚 童舜臣 陳守瓚 以上照考察不謹
 擬冠帶閒住御筆抹去冠帶二字
 此案主筆者首輔韓參定者次輔錢李暨部院三人也首輔持
 正有餘剛斷不足況冢宰身曾頌逆而與定附逆之案有私
 庇同黨掣肘當事者乎所賴聖明嫉惡甚嚴申諭再四諸臣惕
 於明綸不敢不遵命以從事然欲上副聖天子錯枉之權下昭
 萬世臣民之戒者尚有未盡也自此以後下之謀翻者伺之十
 七年如一日上之堅持者亦十七年如一日直至南渡後馬阮
 用事案翻而國運隨之以盡尚得謂小人之進退不關興亡大
 數哉

命給慘死諸臣高攀龍楊漣左光斗周起元周朝瑞繆昌期魏大
 中周順昌李應昇周宗建袁化申黃尊素夏之令吳裕中萬燦等
 三代誥命從吏部驗封司郎中徐大相之請也

先是褒卹命下各家諸子赴闕謝恩上訴先臣受冤始末因各有所陳乞如楊之易周廷侍夏承請給還原贓卽各奉命給五百金魏學濂疏其兄學泚死孝請附葬耐祭高世儒繆虛白請母氏封誥遜之請祖父母封誥皆奉旨俞允至是周茂蘭疏援會典覆允矣封司徐公謂各臣事同一體不宜有異封典該部職掌不須子孫一一自陳遂合諸臣姓名彙題同請卽奉俞旨斯直從前未有曠典敢備記之以志聖恩并見當事善推上意表揚先忠之盛美時政府司票擬者爲首輔韓蒲州次輔錢華亭二公云

鹿善繼敘同難錄略云皇上神聖其用意深遠每非臣下所能窺如言及逆黨人孰不詈之恨之未幾而漸平矣言及諸忠功臣孰不憐之痛之未幾而亦漸平矣漸平漸忘且託於見善不喜聞惡不怒之說而復厚誣吾君於逆案欲從寬於褒忠欲從薄也至欽定逆案凜然天誅而三代誥命之給卽在此時然後

知聖主善善惡惡不爲衆淆不以久倦且不因煩生厭也肯持忠不望報之論使爲惡者畢竟得利爲善者畢竟不利也耶

御史方大任疏奏會審曹欽程事欽程面出揭言馮銓爲其房師召欽程使論周宗建四人以周在先張慎言次之張曾論其父也必附以李應昇黃尊素則南樂深仇也數日後復召至其寓李魯生先在袖出疏稿通欽程上矣次年冬田仰以浙臬齋奉入京與馮言吳越之會有七人一黨周順昌周宗建高攀龍黃尊素繆昌期李應昇交通周起元私謀翻局馮卽欲謀致七人於死復欲迫欽程再上疏欽程力拒之馮大怒卽授意本房門生潘士聞上疏薦仰而論欽程仰立轉京堂欽程立遭削奪是首造意者馮涿州成其謀者李魯生欽程其威逼脅從者也後此之播虐專主其事者亦涿州成其謀者田仰也其言鑿鑿如此銓媚璫害人章奏屢見卽臣亦銓使其門生王珙所參臣去年已久告其詳矣今總聽皇上之睿斷云田仰隨有疏辨言欽程參四臣於乙丑之二月臣

不在京七臣被逮於丙寅之七月臣入賀事竣久赴粵矣欽程且謂於彼無干何以反謂臣造惡乎時逆案已定聖旨遂不深究止欽程坐大辟

欽程之疏出於馮銓確矣至丙寅李實之疏據實辨為李永貞誘空頭印本入京填寫則亦有銓等與謀何疑惜當事僅以永貞欽程抵罪竟未窮究其事也若田仰辨疏云七臣死於丙寅七月時已事竣赴粵然實疏之上實在二月諸臣被逮皆在三月被害在六月正仰在京時謬云七月遁詞情見矣況仰與馮銓魯生本至交即非造謀之人亦與謀之人也竟得脫然事外僅以京察拾遺奪職幸矣至竄伏數年弘光南渡夤緣然灰復起淮揚總督兵至投降小人故態如是又何言哉

二年二月十四日皇長子生中宮周后出永樂以後惟自武宗毅皇帝為孝宗正宮張皇后所出其餘中宮並無生子者后父周奎係蘇州府長洲縣人后生於葑門內今有坤儀鍾瑞坊

尚存后幼隨父居京師以天啟七年選為信王妃旋正位中宮后父封嘉定伯有賜第在葑門

聖躬燕處之所為屋三間而不並列由第一間而後第二間第三間其第三間聖躬燕息處也第二間中設大薰籠置衾裯之屬凡召幸宮眷至第一間則盡卸諸衣裳裸體至第二間取衾裯被身乃進第三間也所謂抱衾與裯也即中宮與東西兩宮不敢不遵行此禮惟先后以藩邸同甘苦不肯赴召又駕至中宮后必趨出宮門外接駕先后亦以糟糠故廢此禮不用

應天巡撫曹文衡奏解進罪輔顧秉謙窖藏銀三萬八千餘兩請畱充該府本年兵餉奉旨允行秉謙素行貪鄙天啟中以投身逆璫得大拜在閣四年唯以婪賄為事至秉軸票擬一奉逆璫之意旨然貪鄙之甚璫亦漸厭之於是准其請告歸家璫敗後臺省交章劾其庸惡無恥媚璫誤國奉有頑鈍依阿之旨居鄉猶肆虐鄉里贖貨無厭崑山合邑士民積怨不平羣起攻之登門辱詈秉謙

於昏夜挈貨潛遁其居室遂搶奪一空州縣力爲禁緝士民稍安旋奉旨搜其家中所遺已爲人藏匿及地方搶散殆盡止得其窖藏見銀尙有此數蓋僅存十之一耳

詹事羅喻義等公疏爲故輔張居正陳情乞恩奉旨居正佐我皇祖肩承勞心力振紀綱飭弛舉廢多有可紀雖以奪情及身後蒙議然過不掩功委當垂卹張居正其子懋修量復職銜該部從公看議具奏准復二廕并給還應得誥命

工部節慎庫主給發商人土供顏料銀兩最稱弊數設有監督主事一員巡視科道二員皆爲釐奸剔弊計而諸臣奸弊更甚二年四月尚書張鳳陽發其事有發銀一千兩實給四五百者上特御文華殿召對面詰再三拏巡視科道王都高賚明主事劉麟長俱下獄究問又追論元年同事諸臣祖重華吳阿衡二人狼籍最著者俱下獄後以邊才出爲監軍御史餘分別譴謫

命收葬熊廷弼從其子兆璧請也先是御史饒京疏中言及閣中

已擬批行而御筆抹去之至是因兆璧上疏閣臣卽具揭爲辨白略云廷弼初任巡按任總督其功狀皆有可言至遼陽旣失再起經略與巡撫王化貞戰守異議廷臣又爲之分左右袒致廣寧潰敗與化貞並馬入關挾伎昧淺衷誤疆圉大計以此殺身無辭公論今傳首邊廷頭足異處已足爲戒矣然使當日按封疆失陷之律偕同事諸臣一體伏法自當日瞑乃先以無影賄賊坐楊漣等作清流之陷阱旣又以刊書惑衆藉端偏殺身死賊懸辱及妻孥長子自刎斯則廷弼死未心服也且自遼事以來騙官營私不知凡幾廷弼再任不取一錢不通一饋終日焦唇敝舌爭言大計似猶此善於彼魏忠賢竊柄人俱靡然從風廷弼一長繫待決之人終不改其強直自遂之性以致獨膺顯戮慷慨赴市耿耿俠腸猶未盡泯今傳首已逾三載收葬原無禁例且茲事雖屬封疆於邪正本末無有關係數年來是非功罪悉在聖鑒或不以爲謬也始奉旨允行至四年秋後行刑化貞亦卽處決矣

四月十七日上講讀既竣出一疏示輔臣則山東益都縣有驛丞黃道妻爲夫頌冤蓋鄉紳唐煥之弟行馬牌不厭意捶斃驛丞之子以觸柱死父以叩闈死都中其妻官氏復上書訴冤也上曰驛遞申飭屢矣何從橫敢爾子弟如此本官可知鄉官如此地方可知一府同知代爲申詳不能竟道府匿不報皆當重懲輔臣承旨退上方欲清釋遞故畱意如此而辭氣仍安和不迫也上親講讀凡講書史遇詞旨無甚關係及凶暴不祥宜避者悉置勿講或越過一二章或數章舊例也一日講官丁進講中庸越鬼神章講舜其大孝二節上卽展前一節環視欲問未果已而李孫宸講君子無所爭一節則自子張問十世以下至季氏旅於泰山越七章講將半上復展前數葉颯然有聲講竣遂問前幾章何以不講孫宸婉轉對曰此數章無甚妙理上又問復對曰是閣中派定也上指旅泰山節曰想爲季氏僭分耶旋宣講官丁進進出班跪上命之起遂問鬼神之爲德章無甚忌憚何以不講進遂巡未

對上顧輔臣輔臣皆趨近御案首輔韓爌對曰鬼神之事頗涉窈冥上曰還要補講起來進承旨叩頭而退聖心畱意典學如此六月初九日召對廷臣於平臺上曰天時亢旱雨澤愆期朕日夜焦憂所以召卿等面諭從今日御文華殿齋宿可傳示大小臣工竭誠祈禱無事虛文或刑獄失平都要清理歸結朕擬一諭卿等參酌輔臣起立案傍上指示諭中款次正色言曰如此大旱皆因政事失常是朕不德所致輔臣韓爌奏皆臣等奉職無狀以致皇上焦勞上曰也不是只等說還須上下交修修舉實事卿等俸祿俱是小民脂膏見此荒災心豈能忍又曰各衙門事多沈閣科道官通不言他們於外事誰不知只是礙於賄賂情面如御史梁子璠條陳汰冗官先上二疏後又催二疏只纔不是虛文仍以聖諭授輔臣曰未盡事情還再參酌復召諸科道勉以該言卽言七月督師袁崇煥斬總兵毛文龍於皮島奏報文龍逆跡昭然機不容失便宜從事席藁待罪奉旨文龍靡餉冒功通口有跡事關

封疆安危闔外原不中制不必引奏

按文龍向爲遼東參將遼陽陷逃至海濱適有難民數千文龍以術籠絡之同航海至皮島蓋皮島居遼東朝鮮登萊之中稱孔道文龍斬荆棘具器用招集流民通行商賈凡南北貨咸於毛處挂號乃得發不數年遂稱雄鎮又掠沿海零丁或指爲奸細或稱臨陣斬獲以是積功官都督挂平遼將軍印逆賢時內奄出鎮各邊文龍疏請奄監其軍上卽位嚴汰冗兵敕下山東撫按檄登萊兵備王廷試往廷試受賄遂稱文龍兵馬可用絕無冒破文龍亦憚上英明思自立功名遂與□□通誠願捐金二百萬易金復二衛地奏恢復功邀上賞已成約矣袁崇煥以督師出上召問漫以五年平□爲期及履任規知毛有成約陰遣喇嘛僧啖以厚利冀解毛約以就袁□最重誓約堅持不可喇嘛僧曰今惟有斬毛文龍在彼不爲負約在我可以成功袁遂以閱武爲名直造皮島大閱軍士毛置酒高會次日文龍謁

袁亦置酒畱宴酒半伏甲起稱有密旨卽座上擒文龍斬於轅門外時崇煥布陣嚴整衆亦不敢犯毛部下千餘人散往他處餘衆悉就撫事定然後入告朝廷亦姑容之先是崇煥陞見入都閣臣錢龍錫叩以邊事答以當從東邊做起錢謂舍實地而問海道何也且毛帥亦未必可得力崇煥云可用則用之不可用則殺之至是疏中卽入錢語錢後竟以此得罪文龍旣被殺袁疏請增餉三百萬謂五年之後遼事平并前所加各項皆可蠲除此一勞永逸計也上令廷臣議皆報稱不可袁計窮至十月遂致北兵入口矣

九月二十六日斬決重罪二十人內田吉倪文煥吳淳夫梁夢環李夔龍皆逆案也楊鎬渠家楨張翼明封疆失事也高道素殿工侵欺也故事部開決囚單必以民犯強盜叛逆及正人命列於前聽上句決幾名而止若官犯則列名於後是年疏上上御筆獨將後開逆案諸人句決先是中宮以皇子大慶請免行刑上曰生子

固大慶事誅有罪亦大慶事當並行而不悖旨下政府揭抹面抹再三上曰不殺此輩則逆案爲無名政府曰此輩不過患得患失之鄙夫耳上曰既是患失便可以無所不至政府不敢言時方久旱行刑後大雨

高道素督造桂王府第侵欺錢糧無算諸工俱潦草塞責卽棟梁皆極不堪者一夕大風雨後殿數帶俱傾壓死宮眷百餘人以後每遇風雨王必露立廷中深座覆壓之懼也上以是句及之閣臣以爲請上曰朕若出就藩封就是只榜樣高道素監道府第使數百宮人死於非命卽寸斬道素尙未蔽辜又何請焉道素自謂必無虞沈醉出獄門臨刑方醒倉皇不能出一語但連呼如何如何而已

北兵從長城下大安口直抵遵化時新令汰冗兵被汰者謀作亂至城下開門迎入遵撫王元雅死於亂軍中同死者知縣徐澤以新任推官何天球已升未去保定推官李獻明以查盤來教諭田

毓齡守備劉聯芳時十月二十四日也遂破三屯營總兵李國棟自縊山海總兵趙率教帥兵赴援兵營於七家嶺猝遇敵全軍覆沒將攻薊州袁崇煥親帥部將督遼兵萬騎自山海直入薊州守護因舍薊而掠三河豐潤玉田三屯馬蘭諸處有內守不堅而殘破者有邑令嚴守而無恙者其死難加卹者良鄉令党還醇清河令任光裕也固安令劉伸涖任方十日聞報先運藏倉庫身帶印篆出走家人被殺者二十口竟以城陷不徇問大辟監固安獄中十年方得遺戍

命滿桂爲武經略總理援兵諸鎮悉聽節制桂戰安定門外袁崇煥戰廣渠門殺其王子一人初袁自關門入援中外注望捷音迨駐兵郊外訛言繁興上意方急退敵待之有加禮召見文華殿自起慰勞呼以督師問禦敵之策賜御膳解上貂裘賜之又與祖大壽各賜盜甲一副及東便門之戰殺傷相當鋒少挫督師兵亦疲甚有入城休息之請先是郊外徹侯中貴之園圍墳墓爲兵

踐蹋毀拆各中貴因環訴督師賣好不肯力戰上已心動矣及奏
入上懼然心動復召對詰問良久言及援兵入城上聲色俱厲遂
縛崇煥下獄閣臣謂臨敵易將兵家所忌上曰勢已至此不得不
然袁既下獄關兵之在城外者闐然稱亂幾欲集矢城上命兵部
從獄中出崇煥手書慰止之祖帥亦竟擁其重兵颺去

楊士聰曰己巳之變袁崇煥初至一戰人心始定迨後鈐制諸
將不爲無見而袁爲人疏直於大璫少所結好毀言日至遂罹
極刑厥後滿桂一戰而敗安見鈐制諸將爲非宜哉乃京城小
民羣然以爲賣好而詈之矣袁既下獄遼兵東潰皆言以督師
之忠尙不免我輩在此何爲上乃出諭暫令解任聽勘而先入
言深竟不可解矣

當本兵王在晉被譴後上召對羣臣升工部侍郎王洽爲兵部尙
書洽山東人伉直無私援相貌極雄偉上私語云好似門神有術
士卽卜其在任不久以門神一年一換也至是□入十一月十六

日召對羣臣多言中樞備禦疏虞調度乖張先旣不能預授方略
今又不能整頓兵馬簡討項煜又引世廟庚戌故事云斬一丁汝
夔將士震慄上遂下洽於獄以左侍郎申用懋代之升口北兵備
梁廷棟爲順天巡撫起舊帥楊肇基爲薊鎮總兵又起舊帥王威
尤岱楊御蕃孫祖壽出罪帥馬世龍於獄俱以原官立功
起舊輔孫承宗督師通州仍入朝陛見十月十五日至弘政門上
卽召入諭曰守禦百無一備卿如何爲朕調度承宗曰臣聞袁崇
煥駐薊州滿桂駐順義侯世祿駐三河此爲得策又聞尤世威回
昌平世祿駐通州似未合宜上曰卿欲守三河何意承宗曰守三
河可以阻西奔可以遏南下上曰卿卽爲朕調度京師承宗曰皇
上當緩急之際不恤軍士性命而使之飢寒恐非萬全之策上曰
卿言是卿不須往通面諭首輔草敕賜劔出朝卽周閱都城草揭
回奏畢次日出閱重城乘月巡濠塹度險阻質明又奉後命警報
逼通星馳通州料理蓋上意謂守近不如守遠故仍行守通初命

也時倉場總督孫居相保定巡撫解經傳皆駐通州不受調度都城已傳通州三河等處皆失孫到通州遣人齎奏至上始喜曰通州固無恙乎卽奉旨大小官員俱聽督師輔臣節制
孫承宗奏初三日通州守城者瞭見遼兵紛紛南下初四日知祖大壽全軍東潰自通州南二十里以趨張家灣渡河臣以手字慰大壽并傳一檄以撫三軍令游擊石國柱飛騎追之極力開諭軍校亦多流涕但曰主將已戮又將以大礮盡殲我軍故不得已至此國柱又前追而大壽已遠去矣時訛言大壽且與□合反戈相向承宗因密奏大壽危疑既甚又不肯受滿桂節制乘一軍驚駭又以放礮洗軍之說激而東潰非諸將卒盡欲叛也遼將大半爲馬世龍部曲臣謹遵便宜行事之旨密遣世龍往撫苟見世龍必有解甲而歸者又密札諭大壽教以急上自列東兵殺賊以贖督師之罪仍許代爲別白大壽得諭大哭其部曲皆哭乃如指還報而前軍已過永平矣

祖大壽率所統兵至山海關城南較場列營署鎮朱梅同監軍道王楫赴營勸其反戈自效言未畢衆兵擁大壽上馬奪關而出隨有馬世龍捧旨由正關出招諭多時大壽乃率諸將叩頭世龍卽諭之云諸將旣感聖恩當鼓全旅進關再選未去馬步萬餘以繼後用保宗社則聖恩可酬督師可生汝等可成千古人品否則終於大義未安委曲撫導諸將皆說大壽乃受約束暫歸汛地承宗亟使世龍報命隨遵旨移駐關門防守
滿桂勇悍敢戰而矜己自用督諸將出陣軍無號令不能約束以十二月十六日誓師而南十八遇敵於蘆溝橋一戰而全軍殲焉桂與孫祖壽皆死之黑雲龍麻登雲虜去黑後於四年九月反正逃歸上獨念滿孫二將血戰捐軀命禮部官出城致祭并查子孫優卹

庶吉士劉之綸金聲俱上疏請纓自效并薦奇士申甫可爲大將上卽升之綸兵部右侍郎爲戎政副協理申甫特授副總兵捐內

帑十七萬聽其調度召募改金聲爲御史監其軍然甫實游談無實所習僅役鬼之術所募兵皆無賴子十六日統兵至良鄉與敵遇所造車不可用試術亦不驗所統七千餘人俱敗事聞命棺斂給卹金聲亦未出城得免於難之綸以三年二月帥師至遵化遇敵自永平回合兵沖殺前兵既衄敵卽遣官招降之綸不屈力戰而死

上以城守潦草下工部尙書張鳳翔於獄管工司官長洲管玉音崑山許觀吉四川周長應上海朱長世俱廷杖八十臨時閣臣合詞祈請寬宥上曰目下與敵止隔一牆宗廟社稷都靠這牆若這牆一倒宗廟社稷都沒有了豈可不重處時許周朱俱斃杖下張管贖徒

山西巡撫耿如杞率兵五千人入援皆勁卒也最先抵都城下兵部卽調守通州明日又調守昌平又明日調守良鄉功令兵到初日不准開糧次日到營汎地方乃准開糧西兵連調三日皆不得

糧旣餒且怒遂沿路搶掠耿以不戢軍士逮問大辟次年棄市耿在天啟年閒官薊州兵備以不拜逆瑞生祠爲撫臣劉詔誣劾問辟幸遇上登極赦罪復官卽超升巡撫崔越兩年竟得罪死西市深可痛也自如杞逮後五千人鬪然各散潰歸山西而晉中流賊從此起矣

內外城守以退往三河一帶方少寬二十六日夜刑部獄囚盡逸幾爲大患次日城門復閉爲捕囚也刑部奉旨時方戒嚴獄囚逃逸典守官所司何事尙書喬允升侍郎胡世賞提牢敖繼宗俱革職著錦衣衛監禁

元年枚上一事以烏程許虞山故遂高閣不行至是蒲州將乞休力請點用十一月初六遂欽點大名成基命改名靖之入閣又於十二月二十一日特命宜興周延儒會稽錢象坤桐城何如寵蒲州忠厚拘謹不能仰副聖意騎旣退中書原抱奇遂出疏參首輔與袁崇煥通謀誤國右庶子丁進以升轉愆期亦出彈章工部主事

崇禎朝事一
李逢申繼之蒲州遂請告回籍其禮尚從優厚云抱奇固貲郎不足言丁與李皆蒲州己未所取士也丁奉旨以陰陽閃爍降二級李以監督火藥失事下獄遣戍蒲州後以北兵破城死難其事未詳故失記

上時銳意功業本兵申用懋老成持重無所作爲梁廷棟智巧人也初自邊道超升巡撫旋進兵部尚書督師薊通爲上所倚任三年正月初五日內旨申用懋著解任回籍梁廷棟回部管事北兵雖東歸復破永平灤州盤踞不退永平鄉官白養粹首先迎降獻女以行媚孫閣部率師東行嚴檄各將共攻灤永有舊永平兵備張春素得民心曾練有鄉勇二萬皆精銳可用逆璫時張春被劾罷歸鄉勇皆散至是復起春爲太僕少卿整飭永平兵備永民聞之皆率先來迎向所練鄉勇亦皆來會軍聲大振四川永寧兵備劉可訓甫破安酋奏捷遂率勝師入援兵部司務邱禾嘉以監軍入祖大壽幕激以忠義於是各帥起營直薄灤州張春劉可

訓馬世龍等皆身被矢石誓不反顧見勢逼遂開東門而出而灤州告復永平城中聞灤州既復咸有叛志既虜掠滿志復見城中心變一夕屠城而去所存者十之四五而已大兵入城白養粹已死其母尚存張春先至盡封所有而出絕無染指世龍盡取之大壽至空無所有遂將白母用嚴刑乃盡出積藏蓋幾百萬云餉司陳此心鄉紳郭鞏俱以剃髮投降逮問鞏固逆案問徒向以首媚璫爲周忠毅參論者也至是始以大逆論斬先是遵化之破有原任兵備賈維翰率衆投降卽授偽巡撫之職至是亦同擒治正法凌遲并同事十人俱傳首九邊隆萬以來除海忠介外從未有以乙科躋節鉞者庚午恢復灤永後升四川副使劉可訓巡撫順天兵部司務邱禾嘉巡撫山永係新設前屯兵備孫元化巡撫登萊漢中兵備劉應遇巡撫甘肅皆乙科也一時其得四人邱以九品末郎直躋中丞尤屬異數自後超用甚多至陳新甲直正中樞之席然究無一人建功立節足副破

格之特恩者

三年二月初十日冊立皇太子。上以戒嚴免升殿。百官聽宣。敕於午門外行十二拜禮。賜三品以上及日講花朵紅一匹。三品以下皆半紅花枝。用角日講官紅全匹。花枝用銀加恩。輔臣及督臣皇親周奎及司禮監有差。禮部尚書李騰芳加太子少保儀制司郎中賀世壽升光祿寺少卿。

袁崇煥逮問後。御史高捷疏參錢龍錫。即指袁疏中輔臣錢某相商之語。指為同謀。時同志者勸錢於辨疏中當痛言一番。明主可為忠言而錢竟不能從也。引罪疏甫奉溫旨。隨即入閣。高捷再疏。遂得旨著致仕。至是方悔不用前言。則已晚矣。

御史蔣高捷袁弘勳三人皆附楊維垣。力持黨局。方璫勢初敗。維垣既斥。三人連疏參劉鴻訓之持正票擬。又力阻舊輔韓爌之召用。以此得罪。公論奉旨革職。時主票擬者錢龍錫也。迨劉以改敕事敗。冢宰王永光遂力為三人求復官。科道交章論之。上方注

意。王永光竟因其言用蔣捷二人。弘勳則令俟勘問事結。另擬。

時弘勳擬又以賄

賣舉人事

被參劾也。適遇邊警。袁崇煥以通款下獄。二人遂與王永光合謀。借

崇煥以報龍錫。因錢以及諸人亦成一逆案。為翻前案地。溫體仁主之。欲發自兵部尚書梁廷棟。初以外任。被特簡。懼上英明不能遽起大獄。不敢發其事。韓卒以此去。錢竟逮下獄。問辟。

刑部越獄之變。奉旨拏尚書喬允升侍郎胡世賞。提牢教繼宗於錦衣衛時。內外戒嚴。故上怒甚。欲重懲之。至次年三月初十日。御講筵。講臣文震孟進講。君使臣以禮章勸。上培養士氣。推心感人。勿徒嚴刑峻法。以啟猜疑。語極剴切。上為改容傾聽。講畢。退上傳諭。講臣暫留。初疑有所召。對後殿門俱開。退至閣中。則聖諭已宣。付閣臣釋諸臣。送刑部。乃知諭留講臣。俾即見諸施行也。

諸臣既下刑部。尚書韓繼恩復以勘問從輕革職矣。更命都察院易應昌定罪。易擬以法止當杖。屢旨駁問。易執奏再三。上大怒。下易錦衣衛司官徐元嘏。杖五十棍。後部擬喬以年老篤疾。准遣

成胡擬杖赦亦遣戍
易既下獄錦衣衛奉嚴旨打問兩次以為執法庇私無人臣禮令
法司從重擬罪部擬易罪以寬擬喬允升今允升已從寬論戍應
昌之罪亦不能加又奉嚴旨以允升自以老病減等應昌違制徇
私當依律加等論不得借以求寬再駁再問竟坐大辟繫獄時京
師雷雹大震會審之日雷擊審官案於是上警悟緩獄并停天下
行刑至次年始以天早齋禱方得釋放

崇禎朝記事卷一

崇禎朝記事卷二

四年正月日召廷臣及各省監司官於平臺上召浙江副使周
汝弼問浙閩相去海寇備禦之策汝弼曰去秋寇犯海上五日即
去問江西布政何應瑞宗祿何以不報應瑞曰江西山多田少瘠
而且貧撫按查覆有司尚未報耳問湖廣布政杜詩爾楚去夏民
變樹幟何也詩曰樹幟之後地方仍安問福建布政吳暘陸之祺
海寇備禦若何暘曰海寇與陸寇不同故權撫之上曰李魁奇何
又殺之暘曰魁奇非鄭芝龍比即撫不為我用今鍾斌又反側不
可保上問實計安在之祺曰多練鄉兵多設火器以戰為守此上
策也問河南布政楊公翰賈鴻洙以有司收稅耗重宜參來處治
鴻洙曰近已革去矣問山東布政陳應元焦元溥曰爾省負宣大
兵餉數十萬何也應元曰近已解納問其數曰七千兩上少之曰
宣大兵多而餉甚急其毋玩問山西按察使杜喬林流寇披猖是
否盡係秦寇喬林曰寇在平陽或在河曲須大創之但兵寡餉乏

耳上曰前報已蕩平何復生發喬林曰山陝界河倏來倏往故河曲被困問河曲之陷對曰失於內應問句引何人對曰大抵出於飢民間陝西參政劉嘉遇寇與飢民相煽地方如何料理嘉遇曰寇見官兵即散退復嘯聚上曰寇亦是赤子可撫即撫之對曰今方用撫上曰前王左挂子既降何又殺之對曰彼雖受撫仍行劫掠是以殺之問近日情形如何對曰一在延平一在雲崖宜川問廣東布政陸問禮爾已升南贛巡撫了該地方多盜若何對曰南贛在萬山中接壤四省當行保甲練兵上曰此須實做問廣東海寇若何問禮曰廣東多至自福建舟大而多火器只是把守海門勿容登陸方不為害問廣西布政鄭茂華靖江王府爭繼事若何茂華曰憲定王二子履祥履祐祥早沒王請立祐為世子而祥有未奏選之妾生子今已長是以爭王位久定未敢輕議問四川布政華敦復鄉紳挾制官府事若何敦復以欠糧對上曰守臣何不彈壓敦復曰遠方州縣多科貢故不能時雲南布政婁九德已經

劾處問貴州布政朱芹安位撫事如何芹曰督撫責安位四事一擒奢酋自贖已獻樊虎奢寅妻馬氏一責送撫臣王三善樞已送出一責修理九驛已漸報完一責削地安位不能從故議未決對畢召各官諭以正己率屬愛養百姓用命有顯擢如或有貪贓壞法國法嚴明決不輕貸諸臣叩頭先退又召左都閔弘學副僉張捷高弘圖諭之曰巡按賢則守臣皆賢若巡按不賢其誤事不小屢諭回道須嚴考核以後斷不可輕徇又曰卿與吏部實心任事天下不難為諸臣承旨退

日講官文震孟奏臣見羣小合謀欲借邊才以翻逆案雖聖意持之甚堅奸黨圖之愈急故於子語魯大師樂章願皇上剖晰是非辨別邪正蓋一音雜而眾音皆亂一小人進而眾君子皆廢天下容有無才誤事之君子必無懷忠報國之小人今有平生無恥慘殺名賢之呂純如且藉奧援而思辨雪又見王永光無事不專而濟之以很發念必欺而飾之以詐深計巧謀無所不中變亂祖制

擯斥清才舉朝震恐莫敢訟言臣下雷同豈國之福故於五子之歌章言識精明則環而向者莫敢售其欺心純一則巧於中者無所投其隙爲此語者實憂治危明之極思願大小臣工當視國如家除凶雪恥不當分門別戶引類呼朋也奉旨寓規時事知道了所指呂純如慘殺名賢年例變制等語著據實奏明震孟回奏純如爲福建守道詔媚稅監高案周順昌時爲福州推官翦除稅棍純如恨之後純如投身逆璫躡取節鉞順昌訟言攻之純如遂挑巡撫毛一鷺構成李實之疏而順昌被逮慘死矣其致死之由全出於純如今當先上疏求雪恃有吏部尙書王永光爲之奧援故首倡邊才之說而純如之疏卽繼之呼吸通靈提掇如響至於會推年例吏科都給事中陳良訓誰爲開送商訂不過以其稍秉公道每事參駁乃借外轉以除礙手耳至考選新資度無所施其籠絡乃獨斥一才名素著之陳士奇而十年冷署之潘有功亦以猜疑見棄大臣之心術如此亦不忠之尤者矣永光疏辨前閣部定

案時臣被言注籍純如入案臣不及知何自援而出之至借邊才以翻逆案或指王之臣一事然之臣在三等之列從考功一法注有涉歷邊疆稍寬一黜之語何嘗必欲借之必欲翻之至陳良訓濫廁首垣與參廷議人言嘖嘖夫豈無因至考選過堂十六人內選授科道十四人部屬二人此二人單各有名徒以前途正遠因才儲用期待殊不薄也時永光已密結大璫爲之地謂文有私於三人於是聖意拂然內批遂有挾私牽扯不堪講官之語閣臣揭進爲講官存體改批云講官循職自可敷陳不得任意牽詆此疏在三年因序王永光事故并書於此

呂純如吳江人天啟中任部侍郎護送惠藩之國其復命疏於護送太監劉興趙秉彝皆極揄揚褒美有云其愛地方也卽一草一木之恐傷其自愛也又一新水之若浼仁聲遐布清節可師至歸美逆賢一則曰廠臣之選才良再則曰廠臣之率屬嚴云云此係邸報鈔傳四海共睹當鼎湖之泣純如見任佐

樞密弄神通潛行改換乘邊警方息之後擬借邊才以翻逆案
王永光等爲之奧主純如遂首先上疏訟冤謂復命疏未嘗歸
美厥臣不當列名欽案且引聖諭云須有憑據不許借題又謂
紅本在御前副本在通政司鈔案在禮科其時爲天啟七年九
月必有說謊以欺諸臣因說謊以欺皇上臣姑不盡言等語通
政章光岳卽爲封進時呂氣傲張甚言路盡暗故文文肅特出
疏糾之云

當永光於天啟癸亥任南總憲比匪范得志參處南臺王允成李
希孔因得罪公論先忠毅時初任西臺特疏參其陰陽閃爍諸奸
狀永光始以病歸至乙丑春逆璫既逐諸正人去崔呈秀徐大化
薦之起位大司馬卽有兩疏頌璫四海鈔傳邸報共睹丙寅以天
變修省司屬王陞張履端二人力勸其疏救大獄因之去任然非
彼意也崇禎元年起位冢宰獨護持璫局至上命同輔臣據發出
紅本定逆案諸臣永光因己亦有疏在內力爲諸人庇覆以自爲

掩飾地廷臣交章劾之以爲永光身係頌璫之人不可以定從逆
之案又言永光爲逆臣崔呈秀徐大化諸人所薦爲正人李應昇
所參邪正已自了然今雪消覓見終抱狐兔之悲雖換面改妝尙
存鷹眼之疾等語前後疏參者如吳姓張國維陳良訓李長春王
繼廉毛羽健馬鳴世顧其國王象雲王永吉張繼孟公疏單疏幾
有百餘永光旣以年例箝制科道復薦起史堃高捷袁弘勳以爲
羽翼又因邊警謀翻逆案則薦呂純如王之臣之邊才故文公於
講筵中言之又再疏論糾賴上英明堅持之不能動也至辛未三
月科臣葛應斗糾袁弘勳受參將胡宗明主事趙建極賄有據二
人皆永光私人也兵尙梁廷棟亦發弘勳與張道濬招權納賄事
弘勳等俱下獄論戍吳執御後論永光誨貪崇墨奉旨詰責永光
始認罪去位則宜興當國已悟其奸邪驢而遠之矣

蔣允儀曰始永光與烏程比陽附宜興其實兩人自相爲黨用
一人則居功於己黜一人則委咎於內宜興不覺也辛未春宜

興以主考入闈兩人在外遂顯然示異且以兩年不協公論事俱歸咎於一人如薦之臣純如事絕未嘗謀之於周而告人則曰首輔意也宜興出闈覺之適上詢及之臣可用與否宜興卽對曰若以之臣閒住者可用諸與逆案者俱可賜環忠賢呈秀亦可漸次昭雪矣上乃大悟堅執如初蔣公丁丑年又序先忠毅疏稿中一段云首擊僭逆者楊忠烈繼之者仲達也首擊逆貪者高忠憲代草者又仲達也若夫有一人焉當清明之時執澄汰之柄以好惡之拂逞淆亂之私初怵嚴威名討逆而實庇奸一經邊警輒借題而謀翻案流毒至今尙未有底而仲達袖中彈文獨發於數十年之前吾知應山梁谿兩先生亦必以獻可先見讓仲達以易名之先愧仲達矣此數語皆指論永光事也姚文毅公謂先忠毅有山巨源郭汾陽之先見也亦以此云長垣旣去御史水佳胤疏攻梁廷棟顯爲袁張報復又發其私人沈敏與薊撫劉可訓往來諸奸狀下部獄則梁實授之以隙且實

有暮夜之蹤梁旣不免禍幸中涓左右之得旨閒住於是與長垣俱不能忘情於宜興矣烏程又用其私人閔弘學爲冢宰一時捷足者竟附烏程而操戈向宜興宜興頗危沈敏者紹興人同志說後疏攻烏程與閔宜興脚稍定復飲烏程狂藥謂決不相負於同志舉動不能照管幕客張捷賀世壽知宜興不足謀皆轉入烏程幕以所謀告之烏程因恨總憲陳于廷宮詹姚希孟刺骨至五年三月兵部華允誠疏參溫閔尤激切疑疏出姚手遂訟言排抑姚以主北闈試爲兵科王猷疏參武生冒籍事猷爲袁弘勳門人理正宜查冒籍與否與衡文者無預閣中乃票覆試內一名高岱以不能完篇黜革正副考俱下部議處初部覆疏上上意頗注烏程密揭入而聖心變遂降二級姚以少詹掌南院行矣陳以考核御史畢佐周等廷撲武弁事不稱旨革職爲民事在五年六月九月初七日上召羣臣面諭曰遼東十數年不見平袁崇煥以平

自任朕遣兵湊餉無請不發不意專事欺隱以市米則資盜以謀款則斬帥縱口入犯頓兵不戰援兵四集盡行遣散及口薄城下又潛攜懶麻軍中堅請入城救下法司定罪依律家屬十六以上處斬十五以下給配朕今止流也子女妻妾兄弟餘釋不問羣臣咸頓首無言上卽將紅本付刑部官承旨先出上又曰崇煥罪惡諸臣如何無一言指斥其爲欺罔又曰此番警報朕與諸臣俱有罪諸臣叩首謝是日磔崇煥於市初錦衣衛具獄詞株連甚多上俱不究獨以史堃高捷言錢龍錫密謀主款命革職擬罪刑部會議奉旨謀款行私朝廷若無主之者邊臣何敢行錢龍錫與袁崇煥面商島事卽有人軍斬帥之語明屬同謀著錦衣衛差官旗扭解來京究問龍錫既逮到辨無同謀斬帥與私書主款之事且引首輔韓爌爲證再下部院會議奉旨云逆督謀款擅殺導口流殃龍錫實與同謀先卽面屬後又書訂至於面奏庇護尤屬狡欺會讞允確著監候處決又批刑部疏以科道官都無一言反

借名建白佐款長奸毛羽健毛九華王應斗分別遣配詞臣黃道周疏略云竊見錢龍錫對簿法庭頭搶獄吏羣然相視啞無一言此書傳所未見也世宗決意棄河套心疑開釁撓玄修故一旦破法而誅夏氏今東疆之圖未有定算恢復之計上下持疑獨斷然決意於一纍臣罪輔旣乏斂棋引杯之致廷臣又無蹴芻齒馬之嫌遂使二台灰溺於貫城斗柄銷光於譴室衣冠相語以目不日那敢言則曰那敢歸人心如此誰復挺脊梁擔安攘之績者乎巷議謬愆謂殺罪輔爲毛文龍報仇如此則邊將必驕閣臣權絀故殺一閣臣爲文龍報仇則可爲劉興治樹幟則不可爲邊臣示前車則可爲閣臣作後阱則不可陛下御極以來輔臣負重譴者九人矣一代之閒寧有幾輔何必囹圄憤盈孤卿駢首令傳者謂獄吏甚貴士紳甚賤乎且東江方驚決無誦毛帥以鼓劉帥之理奉旨龍錫罪案原與文龍無涉何稱代爲報仇本朝不設丞相疏內援引不倫至棄河套撓玄修豈臣子所宜言且妄稱夏氏是爲何

語著回話道周再疏言臣恐邊臣藉口閣臣則帷幄之猷不壯故因邊計而引東江因東江而及毛帥因閣臣而引及宰相思古宰相無遙制之實而收遙制之功今閣臣無宰相之名常受宰相之禍有此兩意滯於胸故倉卒屬筆奉旨責其支飾降級調用至四年五月始以天旱修省因科臣劉斯琛又有疏請宥始釋龍錫於獄遣戍定海衛

夏允彝曰錢初出獄宜與過候之極言上怒甚挽回殊難錢甚德之次日烏程至錢述周語致感烏程曰上固不甚怒也錢遂信溫質直而周虛偽不知實溫之巧於擠周以自見德也

袁崇煥既誅有東江舊弁周文煌具疏爲毛文龍訴冤奉旨云逆督擅殺島帥罪案已定毛文龍歷年糜餉牽制無功豈得乘機借端希叨忠義周文煌瀆奏不倫本當重處念係愚弁姑饒他觀此旨始知殺袁爲毛報仇者非聖意也又有義士許俊上疏爲袁頌冤云某日提兵至京營於某處發火器矢石斬首若干又某日於

某處斬首若干若云款于句則三日所得首級何來若云不戰爲退衄則後此能戰者何人疏入下部擬其人謫戍復上疏曰崇煥若通口賣國則臣爲逆黨當與袁同誅若袁非賣國則臣言無罪謫戍非律疏入亦不究

湖廣撫按奏三年五月初二日有沔陽州鄉官譚世講焚死據州申稱百戶趙欽因訪察事本官暗假他人名告陷押解按院世講先捉欽歸很毆是夜欽潛入譚家見世講在堂飲酒扭住不放世講家人即放火截其來路不意天忽反風倒燒房屋欽因將世講殺死投屍火中合州士民因之羣起爲難捕官登城愕視至次日豎白布旗上書四十三里軍民人等被害報仇等語又奏六月初一日鍾祥縣申報道旁豎有紅旗上書九關七反招賢令七字一時承天襄陽荊州武昌岳州所獲紅旗或教場或衙門上書七字相同

譚本甲科歷官潦倒曾謫任江陰縣教諭貪戾之狀至今傳之

崇禎朝言事二
宜其居鄉暴橫致罹慘禍而亂民之起卽是流寇三楚自此騷動矣

曰講官羅喻義進書經講章惟我商王布昭聖武一節中及時事有左右之者不得其人句頗傷政府正講寥寥數言後講聖駕大閱似一篇長奏疏又多用列聖廟號恐鞠躬頻頻不便烏程實恚其隱刺借詞使正字官傳改羅難之正字請羅至閣面商比至閣門烏程坐房中高呼他事久不出迎羅待久之懷憤直至閣中隔板相詰前此未有也烏程遂具疏參云舊例惟經筵進規多於正講日講則正多規少今喻義以日講而用經筵例駁改不聽乃下部議處部覆云聖聰天縱而喻義嘵嘵多言遂以閒住處之在溫不過借題處羅耳若如部議安用講書爲也可謂一諛一諛羅後家居以寇禍死節

四年九月命太監張彝憲總理戶工二部錢糧唐文征提督京營戎政王坤往宣府劉文忠往大同劉允忠往山西各監視兵餉十

月命大監王應朝往關寧張國元往薊鎮東協王之心中協鄧希韶西協各監軍十一月命太監李奇茂監視陝西茶馬吳直監視登島兵餉初上旣罷內臣外事俱委督撫然土英察輒以法隨其後外臣多不稱任使者二年京師戒嚴乃復以內臣監視行營自是銜憲四出動以威倨上官體加於庶司蓋羣相壅蔽矣

從來文場有會試廷試有傳臚禮武場則否四年武舉試有董某者以勇力聞先達上聽時主武試者詞林楊世芳劉必達董以策不中程被格上謂諸臣故拂聖意也下兩主考及監試御史余文燿馬如蛟於獄命改期重試另點方逢年倪元璐主試命內臣監視於十月廿三日首場試技勇廿五試馬箭廿八試步箭初二試策論初七揭曉初十傳臚悉照文場事例特拔王來聘爲狀元賜宴兵部命閣臣主席自此遂爲故事

十一月廿四日召對羣臣於文華殿先召戶部尙書畢自嚴問錢糧舊加派若干新加派若干自嚴對舊五百餘萬新一百六十餘

萬上曰援兵未出之先稱出浮於入者一百餘萬援兵已撤如何
尚未入完自嚴對前此積欠甚多上曰上緊催督還須從長打算
按月給發召兵部尚書熊明遇問各邊新兵若干養兵要爲有事
之備須是守也守得戰也戰得今日果能守得麼明遇對還是守
得的又諭戶兵二部須是同心做一家事不可爭執召左都御史
陳于廷諭以御史考核須嚴考核嚴自然盡職天下自然無事了
又召文選司蔡奕琛李元鼎職方司李繼貞王芋諭以文武各官
俱是爾等經手推用必須得人因問奕琛用劉宇烈憑何推他邊
才奕琛奏科道薦舉上曰只要肯做熟手做得生手也做得方一
藻是熟手麼奕琛對以邊才實難望稍寬文法上又問劉源清何
以推山海總兵繼貞對源清恢復有功且見在薊鎮就近推補又
問三屯總兵王維城何如人繼貞曰亦是恢復有功又問張國振
繼貞對國振原係陪推皇上點用上曰正陪俱要堪用繼貞曰年
來邊事查點愈多使費愈煩上曰畢竟官不廉官若廉吏胥豈敢

作弊又召吏部尚書閔弘學等俱出班跪上曰諸臣公疏遣用內
臣太祖明訓朕豈不知只成祖以來也有閒用的皆出一時權宜
其天啟年用的朕且撤回豈如今反用朕何嘗不信文武諸臣年
來做事不堪萬不得已權宜用他若諸臣肯實心任事要撤也不
難卽如馬政一節如何解馬不堪卽行變賣這等解他何用有言
海禁當嚴前要孫元化奏他便說禁海須撤島明是不肯實心做
事要督撫官何用又重申再三曰文武官肯齊心替國家做事這
內臣要撤也不難

開封推官張瑤杞縣知縣宋致各有才名張負氣不爲人下辛未
考選同鄉宋鳴梧父子在科其門役有所需索張不與更罵之宋
不說及考選以致爲吏科黜張爲同知張因揭致賄營及倩人代
書情弊奉旨覆試而宋卷已潛易矣宋如故張遂降州判孔有德
陷登萊張殉難致亦以壬午之變不屈死
十二月考選科道後更核在任錢糧完欠於是給事熊開元御史

鄭友玄俱以完不及格謫調并責戶部尙書畢自嚴不行糾舉革職下獄吏科顏繼祖疏救上并切責之自是考選將及先核錢糧不問撫字專於催科而戶曹胥吏俱得以操官評之短長矣畢固先朝名碩然年齒已衰錢糧繁劇非所長也先已屢疏請告不得竟致負重譴而去公論惜之

五年壬申四月兵部員外華允誠上三大可惜四大可憂疏言當事者借皇上剛嚴而佐以舞文擊斷之術借皇上綜核而騁其重逋握算之能以皇上圖治之盛心爲諸臣鬪智之捷徑可惜者一人臣展采止此精氣今以窺微指爲盡忠摘細瑕爲快意直指風裁徒徵事件長吏考課惟問錢糧以多士修職之精神爲小夫趨辦之能事可惜者二廟堂不以人心爲憂政本不以人才爲重四海漸成土崩瓦解之形諸臣但有角戶分門之見以興邦啟聖之日爲卽聾從昧之景可惜者三國家所據以總一天下者法也王化貞已與楊錦異辟余大成又與孫元化并逮使輕猾者不以捍

網爲懼矜者且以對吏爲榮刑罰不中斧鉞無威可憂也國家所恃爲元氣者公論也直言敢陳之士一鳴輒斥指佞薦賢之章非訐則黨是非共蔽忠讒互淆可憂也國家所賴以防微者羞恥也大臣握重權而有徒隸之心小臣惟望氣而鮮特立之操中使一遣妄自尊倨與之抗者一左人耳其餘奔走期會諂曲趨承貪競成風羞惡盡喪可憂也用人之職吏部掌之閣臣不得侵今次輔與冢臣以同邑爲朋比惟異己之驅除統鈞大臣甘作承行之吏黜陟大柄祇供報復之私皇上惡諸臣之欺擅欺莫欺於此擅莫擅於此矣疏上責令回奏又極言溫體仁閔弘學比交爲奸私沈演唐世濟等上怒命奪允誠俸一年

浙直巡鹽祝徽廣西巡鹽畢佐周各以戒責武弁奉旨都察院參看以會典軍官等樣具奏方許取問豈得三品軍職擅行懲責掌院陳于廷覆疏厯引憲網有戒飭之條謂非自兩人始且言外衛諸武官目不知詩書口不誦韜略無弓馬之長技無過人之膂力

家居則武斷豪橫委運則抗延侵欺有司不得司其長短惟巡方
銜天子之命有戒飭之成憲創一警百暴橫知戢且所犯細故若
必一一奏聞天威懼其或褻隱忍則又畏惡不悛天下之衛官將
益其驕肆莫可誰何矣奉旨軍官不許擅自句問律例甚明且敕
書亦無懲責字面再行駁議于廷堅執如初至第三疏回奏遂奉
旨以徇情市恩革職爲民時上方有意重武抑文烏程又從旁譖
之故以總憲重臣遽遭嚴譴陳在天啟朝與趙楊高諸公同事以
忤逆璫被逐至此復以抗節不阿得罪去國益見大臣風節矣
工部侍郎高弘圖言臣部有公署中則尚書旁列侍郎禮也內臣
張彝憲奉總理兩部之命儼臨其上不亦辱朝廷褻國體乎臣今
日之爲侍郎侍尚書非侍內臣國家大體臣不容不慎故謹延之
川堂相賓主而公座毋寧已之雖大拂彝憲意不顧也且總理公
署奉命別建則在臣部者宜還之臣部豈不名正言順上以軍餉
事重應到部驗核不聽弘圖遂引疾求去疏七上竟削奪前後論

內臣不遣者南北諸臣如呂維祺李曰輔吳執御魏呈潤金鉉馮
元颺周鑣不下數十疏疏上或降或黜今錄其疏語剴切者摘錄
一二於後

工部主事金鉉疏云昨見太監張彝憲牌開本監公署已完擇十
七日上任兩部司屬官吏等謁見照部堂體制行臣不勝駭異是
明欲驅清署之臣屈膝於奄寺敕諭中曾有是乎彝憲銜猶司禮
職則監視原與巡視體制相等惟貪墨侵欺一體覺察若抗顏昧
心妄自尊大以皇上迪簡之臣子令其馨折偃僂置自有之堂屬
別行僭妄之儀去不易之公庭強抑刑餘之下從此結納奔趨彼
則日驕此則日諂干憲典而壞士風可勝言乎

工部馮元颺疏言聖諭以張彝憲總理戶工事務諸臣單詞合詞
爭之而不能得夫爭之而不得惟在諸臣深體而善承之遠必無
犯祖宗交結之條近必無負皇上釐剔之意皇上以爲以內察外
其弊可得然苟不先爲無弊則其弊終不可得臣以爲其道莫如

禁交謁蓋有交謁則酬酢有情面情面漸熟格套彌堅乞立垂嚴
禁凡在廷諸臣並不許一至內臣之門藏內臣之面內臣既別立
公署亦不得造兩部之室與部臣密邇若部臣錢糧所關均有弊
端內臣卽得糾參若其循職奉公自關人臣分內內臣不得薦舉
不然本欲別弊弊乃愈滋使外臣冀內臣之不來以自便私圖猶
可言也使外臣冀內臣之來以羣爲蒙蔽不可言也

南京禮部主事周鏞言內臣用易而去難此從來通患然不能遽
去猶冀有以裁抑之今但見因內臣而疑廷臣者屢屢矣因廷臣
而疑內臣者無一焉如張彝憲用而高弘圖之骨鯁不可容矣金
鉉之抗直初雖免究竟以他事中之矣王坤用而魏呈潤以救胡
良機處矣趙東曦以直糾扶同處矣鄧希韶用而曹文衡以互訐
投閒矣王弘祖以禮數苛斥矣若夫孫肇興之激直李曰輔熊開
元之慷慨無不罷斥未能屈指每讀邸報半是內臣之溫綸從此
以後草菅臣子委褻天言祇徇中貴之心將不知所極矣嗟乎貂

璫雖巧佞祇是宮闈之趨使簪纓雖迂齷終屬帝王之心膂願皇
上之深思也疏入奉旨削籍禮部員外袁繼咸救之不聽

薊督曹文衡慷慨任事勁直不阿與總監鄧希韶抗不相下具疏
互訐因稱病乞歸奉旨著彈力幹濟以副委任科臣黃紹杰因有
監督不和疏云古來未有反顏相視猶可觀面共事者毋論掣肘
當前雖豪傑不能展手文衡以節鉞重臣慷慨烈士無因而受監
軍之點綴將何顏立於三軍之上猶責之以任事可乎然文衡去
而監軍益不可留何也此番玄黃人人嘯息若欲委蛇附和必非
文衡之人而後可不然肯以鼻息仰乎則有監視必不能容督撫
明矣且廷臣向所慮者不止此今皆已肆然無忌矣祖制不容典
兵廷臣言之頃且幾於立標營地不堪騷擾廷臣言之今已穢迹
自敗露廷臣言仗節負氣之士定遭毒螫今果伎倆遞見矣廷臣
言寡廉鮮恥之夫將開詔附今果有嘖嘖稱頌甘爲薦主門生不
奉旨而擅發營兵者矣前轍非遠漸何可長世界至此寧不寒心

崇禎朝記事二
同時御史宋賢又有疏劾山永巡撫邱禾嘉云皇上遣內臣監視原屬權宜無奈小人逢迎無所不至若為雲程請兵自衛邱禾嘉先為派定六百名猶自歎不能措置其吮癰舐痔之意可見乃部覆議寢而禾嘉復為之請必欲以兵柄授之殷勤若此不可羞哉御史高倬又有監督相構可虞疏皆奉旨議處文衡因復具疏為言官求寬不聽未幾曹終以閒任去

豐城侯李承祚天啟元年兩疏稱頌逆瑞功德請如中山王例封兩公並列兩都瑞磔後定逆案議大辟繫獄矣其子上疏引八議乞寬刑部疏亦為之地給事中吳彥若有疏論之上手批諭內閣云此案情最可恨法原當誅但世勳與流官有閒券文難泯據部疏議革爵遠戍足抵一死否閣揭因為之力請引券文免死之條遂改從寬典然上意極嚴附逆雖追念世勳稍開一面奉誦御札凜於爰書矣是年逆案劉詔與失陷封疆之王化貞俱棄市勳臣中又有襄城伯李守錡靈璧侯湯國祚皆有疏頌奄竟得漏網

七月斬登萊巡撫孫元化元化蘇州嘉定人慷慨好談兵以乙科歷官監前兵備適海氛不靖以元化知海事超升為登萊巡撫大凌河告急部議調孔有德等率兵防援孔故毛文龍部將因文龍之殺原有二心至是奉調往來海島幾犯颺溺比改而從陸不勝怨咨前隊已至吳橋後隊尚滯新城奪取王氏莊僕一雞王氏大族勢凌東省隨稟領兵官必欲正法領兵官不得已查奪雞者穿箭游營眾大譁遂殺守莊僕報知前隊改轅而南時統者左步營則參將孔有德右步營則都司陳有時東江副總兵毛承祿登州參將李九成遼兵三千人皆歆血立誓擁護有德以叛攻破城邑數處距登數十里於馬塘店扎營曰為王所逼非敢叛也元化令參將耿仲明傳諭扎營城外教場候撫教場固有三千營房援遼將卒家屬居焉欲令移入城出房以舍步兵城中拒不納孔說耿亦反尚有遼人在城中者紳民必欲搜戮之遼人遂開門迎師登城告陷時壬申正月初三日也元化始知被給誤事抽刀自刎為耿

仲明救之逼之具疏言狀已復縱之航海歸以二月抵津就逮問
下鎮撫司打問驗其自刎非偽方下部議罪而上遣侍郎劉宇烈
督師既許招撫復誘新撫謝璉知府朱萬年并徐翟二內使殺之
事聞上大怒遂斬元化當日城破被禍者有鎮臣張可受鄉官張
瑤王象復舉人王與夔皆以盡節稱山東巡撫余大成亦以失事
逮下獄論成

孫余二撫既被逮後廷推以徐從治撫山東謝璉撫登萊俱同日
受事賊已抵萊州二月至四月肉薄攻城不捨晝夜贊畫主事張
國臣原奉撫議以出援兵皆畏賊主者姑亦聽之以爲撫事成則
萊圍自解且以援爲名耳三月初國臣遣使入城議撫從治抗
疏言其非中朝以爲不然而賊攻圍益急四月十六日架西洋大
礮擊西南城隅從治方簡閱丁壯指揮出戰左右請少避從治不
可發語未畢而礮中額額身仆而絕矣從治既死萊撫謝璉又爲
賊所誘殺督師劉宇烈逮問下獄更調榆林各邊兵特用朱大典

爲巡撫以禦之至八月中方解圍有德竟自萊入海破朝鮮投誠
於口矣

上召吏部尙書閔弘學兵部尙書張鳳翼諭曰吏部用人根本近
聞選官動借京債到任便要還償這債出自何人身上定自剝民
了恁得有好官肯愛百姓朕前日費幾許推敲纔用卿二人須革
去舊弊爲國家任事又召左都張延登論曰風紀重任表率諸御
史須是嚴加考核不可徇私又召吏科劉斯球河南道李日宣諭
曰爾等以言爲職若直言讜論朕甚樂聞如何動稱言路閉塞你
們議論不管行得行不得只條陳一本塞責多爲卻情面賄賂成
何言官斯球奏臣等有聞必告一毫不敢欺皇上上曰有聞必告
是你心裏說出來的是你口裏說出來的你們有一疏定有一緣
故與疏中所說之事不相關以後如有把持屬託行賄的發覺出
來自有祖宗之法在又諭錦衣衛王世盛清理刑獄不許瞻徇又
徧諭羣臣曰既做一官就有一官職掌件件都該打算天下方能

治平如何一事不做專圖箇名色好聽嚴諭再三皆悚懼而退先是有疏參論監視宣府太監王坤坤遂抗疏指修撰陳于泰發端謂于泰盜竊科名希建言之名爲自罔之術席首輔周延儒比暱之勢借端責備反飾醜狀果否內臣不識一字有類沈同和之曳白云云是借于泰上侵首輔也首輔卽自劾求罷不允廷臣交論不已左副都王志道因上內臣越職輔臣失職疏謂內臣論劾漸廣內則科道六曹外則方面督撫又內則卿貳今則糾輔臣矣國家設輔臣官府黜陟皆其職守內臣糾劾侵權而輔臣不問駁駁口銜天憲手持朝綱而輔臣尙不問將焉用彼相哉奉旨詰責又召對於平臺謂志道曰遣用內臣原非得已屢旨甚明昨王坤疏朕已責其誣妄乃廷臣舉劾莫不牽引內臣豈處分各官皆爲內臣耶志道曰王坤直劾輔臣舉朝皇皇爲紀綱法度憂爲紀綱法度惜非爲諸臣但疏不能詳慎語多謬誤上曰在朕前便多謬誤書之史冊便不謬誤了國家大計不言惟因內臣在鎮不利奸

弊乃借王坤疏要挾朝廷誠巧佞也詰責者再周延儒曰志道非專論內臣實責臣等溺職上曰職掌不修沽名立論何堪法紀命削籍去

給事中陳贊化論周延儒招權納賄游客李元功借勢威人延儒嘗語去輔李標曰上先允放余封還原疏卽改畱頗有回天之力今上義皇以上人也此是何語豈徒小人之輕洩乎且引刑科李世祺爲證世祺奏延儒有是言詔勿問六月延儒予告回始溫體仁將奪其位王坤疏參周時體仁無一語相助於是贊化屢疏卽義皇上一語窮究不已體仁知上意已移凡與周爲難者必陰助之而助周者皆黜周遂放歸烏程擠宜興去位宜興不堪乃謀召桐城何如寵以壓之桐城疏辭不允勉强就道中途復以病堅辭始蒙俞允烏程竭力邀首輔之稱不可得甲戌中秋閣臣例有賜饌大璫傳諭始稱首輔時烏程方在告病痊入直卽開首輔之室以居之當宜興在事又薦用

上饒鄭以偉上海徐光啟二人皆老成宿望也不久相繼告亡至是請枚卜上既點嘉善錢士升又特用巴縣王應熊香山何吾騶二人嘉善雖浙人與諸君子頗相周全唐世濟力言於烏程令收之無爲他人用遂由南禮侍入巴縣宜興亦所注意而烏程援以自助者也命既下給事中章正宸疏糾應熊剛愎自用縱橫爲習小才足以覆短小辨足以濟貪一旦大用必且芟除異己驅鋤善良報復恩仇混淆毀譽且訛言何所不至謂是左右爲緣故倚他途以進將使天下薰心捷足之徒紛馳而起因自附於陽城裂麻之義有旨革職逮問時正宸方以館職外授遂著蹇諤之聲云諭吏部薦舉潛修之士科道不必專出考選館員須應先厯知推垂爲法次年又命改部屬爲科道於甲戌科以後遂停考庶吉士以行取俸滿推知考選改翰林編脩人因爭趨翰苑一途并不屑就科道而營謀者益甚至戊寅年之考有以相爭競而構難者矣五月命司禮太監張其鑑等赴各倉同提督諸臣盤驗散放大監

張應朝調南京與胡承詔協同守備

諭兵部流寇蔓延各路兵將功罪應有監紀特命太監陳大金閻思印謝文舉孫茂林爲內中軍會各撫道分入曹文詔左良玉諸營尋復以閻思印同總兵張應昌合勦汾陽知縣費甲鏢以逼迫苦供億投井死六月命太監高起潛監視錦寧張國元監視山西石塘等路絲核兵餉命太監魏相監視登島兵餉順天巡撫按報三河縣知縣劉夢煒自縊死先是有解餉銀過本縣者被盜竊去三千餘兩奉旨令本縣官賠補夢煒初任清苦憂懼無措遂於私衙自縊當時上司委官入衙相驗行囊蕭索合邑爲之歎息

刑部奏會官處決蘇有功卽毛有功文龍營將降東被擒解京在檻車中飲酒放歌及旨下處決其夜自演象所逃去究其故乃解役每夜放出說書是夜忘收禁也

癸酉秋決之日上素服坐建極殿與諸輔臣相商極其虛懷時溫

體仁當國無所平反內有一人徐兆麟遼東人以舉人任陝西華陰知縣到任僅七日而城陷於賊上以此頗躊躇體仁無一言爲之救解遂致之死人皆冤之

兵部主事賀王盛論烏程私其鄉人考試官丁進摘癸酉南闈黃美中後場奢閭嫖刀青山綠樹語爲關節青山綠樹出朱子心學詩人猶易知奢閭嫖刀乃荀卿侏詩云閭姬子奢莫之媒已嫖母刀父是之喜也大略是善惡顛倒之意上欲查究此四字閣中不能對委之部科大宗伯李騰芳屢費翻尋嚴旨以其不行糾駁令開住去已而部科共擬省直黜革舉人七名又罰科者數人各考官降調有差福建顏茂猷會試全作五經題外簾以爲異知貢舉林鈺爲之題請奉旨念其該博准錄送內簾主考不知上之屬意也置副榜第一出場亦具疏請之上命試錄中列在第一名之前准與廷試拔置第二甲第二名皆異數也

顏中天啟甲子鄉試亦全作五經監臨喬承詔以其越格令止

錄本經進內爲主考顧錫疇房考祁彪佳所拔其人故博學篤行爲士林推重登第後授禮部主事不久卽故或傳其爲仙去云是科場中皆推易一房文公震孟所取陳際泰爲第一同考項煜欲令會元出其門計誘文公謂渠所取乃楊廷樞也楊爲同鄉名士文遂讓之及拆號則李青也項向有項黑之稱一時遂笑傳有項黑得李青之號自後以五經得雋者又有丁丑揭重熙癸未馮元颺

殿試故事內閣擬策問二條請上點用其一無所竄改是科問知人安民上更其大半曰所與其天下者士大夫也今士習不端欲速見小茲欲正士習以復古道何術而可□本屬□地窄人少一且稱兵而三韓不守其故何歎自今三協關隘以及登津等處各宿重兵防□也□不兵不可撤餉不可今欲□恢疆如何作用且流寇久蔓錢糧缺額言者不體國計每欲蠲減民爲邦本朝廷豈不知之豈不恤之但欲恤民又欲飽軍何道可能兩濟卽

屯田鹽法誠生財之源屢經條議申飭不見實效其故何歟至於
漕糧爲三軍續命馬匹爲戰陣急需折截挂欠遂失原額原制何
道可復今雖□□猖獗河套有可復之機邊外儘可作之事但難
於□賊窺伺朝野匱乏近降□即至作何安插插套連合作何開
破流賊漸逸鄖廣海寇時擾浙閩勦□不速民難未已兼之水旱
頻仍省直多故作何挽回消弭又唐宋曾以武臣爲中書令樞密
使文武似不甚分我太祖曾以直廳爲布政典史爲僉都今奈何
牢不可破爾多士畱心世務久矣其逐款條答無諱朕將親覽焉
以上皆宸翰親揮語意淋漓求治之殷具可想見
又故事讀卷官擬上卷十六卷硃圈句讀進呈御批定一甲三名
今上命再呈十二卷無句讀者特拔劉理順爲第一甲後殉甲第
二吳國而以原擬第二者爲第三楊昌擬第一者爲二甲第一李
第三者爲二甲第三陳組御批四卷皆嘉意造士之睿謨也
給事中吳家周疏論溫體仁杜門兩月入闈典試不先不後有私

壟斷而左右望之迹臣乃得以朝廷大典禮問之夫聖壽呼嵩元
且輯瑞體仁獨託病不出矣禘祭太廟春祀社稷亦託病不出矣
經筵開講所以崇聖學獻俘太廟所以昭武功皆託病不出即皇
太子千秋令節終託病如故獨至入場主試則褰裳就之無他朝
賀係臣子恪恭之誼所關在朝廷取士有私門桃李之籍所利在
身家也尤可異者會場題目歷來與君德政治相關未有大臣敢
妄自稱比者今首題以子產自許不思鄭以衰國孱主有難乎其
擬上者若救民於水火之中尤屬不倫堯舜在上雖小醜未靖何
至比吾民於殷喪之季況取殘弔伐亦不宜談於今日奉旨以其
詆誣牽引著降調先是易一房漆嘉祉首篇末有不敬不義之臣
云云本房文長洲取之意烏程必見駁當有一番質辨及呈卷即
批允比撒棘烏程於閣中揚言曰外人說我們要進場取門生今
日地位也靠不著門生了況場中即有人罵我嘉善曰場中如何
罵得烏程曰他文章竟說不敬之臣如何不義之臣如何豈不是

罵嘉善曰如何打發他烏程曰本房批伸眉抗手想見其人敢不中耶是科烏程雖為主考力行阻抑榜額每科三百五十名止取三百會元多扶入鼎甲而李青不得入每科考館獨是後兩科不考至倡議欲令三甲選縣佐貳眾論以為不可而止以總理太監張彝憲請命天下朝覲官將會計冊親齎投送查其完欠以為殿最仍照見部堂體行禮禮部郎中袁繼咸已升山西提學將出京上疏言士有廉恥然後有風俗有氣節然後有事功如總理內臣有覲官齎冊之令皇上從之特以剔釐奸弊非欲羣臣屈膝也乃上意一出靡然從風藩臬守令參謁屏息得免苛責為幸嗟乎一人輯瑞萬國朝宗諸臣未覲天子之光先拜內臣之座尚得有廉恥乎逆璫方張時義子乾兒昏夜拜伏自以為羞今且白晝公庭恬不知怪國家自有覲典二百餘年未有此事可為太息也上以越職言事責之彝憲亦疏言覲官參謁乃尊朝廷繼咸復上疏言尊朝廷自有典例知府見藩臬行屬禮典例也見內

臣而行屬禮亦典例乎諸司至京投冊吏部典例也先謁內臣亦典例乎事本典例雖坐受猶以為安事創彝憲即長揖祇增其辱高皇帝立法內臣不得與外事若必以內臣繩外臣此會典所不載上切責之時有大同知府蔡屏周持冊投進獨長揖而退內臣呼而語之曰此朝廷命誰敢抗蔡答曰朝廷止命查錢糧不命查體統彝憲默然蔡亦不願後借他事參論公論不平隨有以大府薦者上亦不允而罷夫天下之為郡縣者多矣抗節不屈止蔡一人且又出於乙榜其丰骨挺出直超出尋常矣

刑科給事中李世祺以劾大學士溫體仁吳宗達謫於外復罪文選司郎中吳鳴虞以考選非人并謫之袁繼咸復言曰養鳳欲鳴養鷹欲擊今鳴而鉗其舌擊而繼其羽朝廷之於言官何以異此今考選在即銓臣必將徧問諸臣曰汝必不參大臣然後授之臺諫將使言官括囊無咎為大臣者終無一人議其後大臣所甚利忠臣所甚憂也且皇上樂聽者讜言使天下誤以攻擊貴近為皇

上所厭聞其勢將波靡不止上以越職言事罪之先召舊輔何如
寵入朝屢引疾不到給事中黃紹杰奏言從來君子小人不能並
立如寵徘徊瞻顧則次輔體仁當知所以自處矣自體仁在位水
旱洊臻盜賊滿路燮理固如是乎秉政既久窺旨必熟諸臣奉承
其意用一人則曰此與體仁不合也行一事則曰此體仁所不樂
也凡此皆召變之由乞命體仁引咎辭位以回天心慰民望上責
其率妄命降調體仁疏辨紹杰復連三疏劾之其言愈厲且曰體
仁奸欺其說不過兩端一曰朋黨一曰票擬下而朋黨一語可以
鉗言官之口挑善類之禍上而票擬一語可以激聖明之怒蓋債
誤之愆又疏劾佐銓張捷薦用逆璫中人八年二月又疏劾體仁
誤國禍延陵寢再奉旨降雜職用
總憲冢宰俱缺上命公舉堪者來看特御平臺召五府六部九卿
科道面諭曰吏部尚書乃用人的官須要第一等才品若據會推
故套不過精心定力兩語混題止須一二人把持足矣何名會推

卿等各舉所知來吏科盧兆龍奏科道例無保薦只舉有不當方
行糾參上深然之吏部侍郎張捷奏年來諸臣黨同伐異在外會
推自然瞻顧情面孰敢犯忌今皇上面諭各舉所知務得天下第
一等才品須不論方隅上曰立賢不以方卿等奏來定國公徐允
禎大學士溫體仁等共舉謝陞唐世濟等十餘人張捷獨舉呂純
如唐世濟諸臣舉訖捷奏臣舉二人皆舉朝所不欲用者上隨取
疏閱訖諭曰呂純如是逆案有名者為何舉他捷奏純如臣所深
知逆案列名為其頌美逆賢今紅本見在並無一字相及豈可誣
坐上曰他已曾辨過但不可開端因以目視科道曰如何說盧兆
龍奏諸臣薦舉各有本末至張捷所舉呂純如欽案有名臣等正
擬糾舉適聆聖諭已明故不敢復奏捷又奏臣實知純如真清執
可用故從公推舉即在案中亦須別分儻用之不效甘與同罪又
言小民作奸犯科朝廷五年大審每年熱審惟恐其冤何況大臣
如何冤得工科孫晉即奏此是如何比擬今日皇上鄭重冢臣特

召諸臣同咨訪乃以開釋罪囚相喻乎兆龍奏臣任清江縣時
記得純如護送惠藩之國沿途騷擾卽此已見無才況屈身逆賢
其品可知時科道蔣德瑗金光宸韓一光楊繩武俱奏純如斷不
可用捷猶嗷嗷不休刑科姜應甲叱之曰張捷所舉如此心事可
知還敢在皇上前巧辨上卽令捷下去隨諭首輔溫體仁曰謝陞
可明日旨下以南吏部尙書謝陞爲吏部尙書南右都唐世濟爲
左都御史時八月二十一日也時王應熊故善純如又與體仁相
比故體仁陰主之而令發自張捷不虞上之堅持也給事吳甘來
范淑泰交章劾應熊捷同謀黨附冀翻逆案上不聽捷亦屢疏乞
休恃體仁奧援俱邀溫旨十二月間已奉佐計方殷之旨正擬肆
其兇鋒未幾有劉宗祥之疏宗祥先任金壇知縣與捷相善也以
御史巡按四川成都知縣賀儒修者捷之姻戚因作柬託宗祥欲
得卓異一舉柬中有忠言不入朝事日乖之語宗祥入川見儒修
狼籍特甚折於公論循例糾劾有旨革職逮問捷大恨之值宗祥

回道考核捷一力把持擬加重譴宗祥據實剖辨且以捷手書上
聞捷遂革職下獄都察院擬宗祥降三級調外任上抹去之御批
劉宗祥著回道管事後部議捷配贖

張捷在天啟初官御史疏論三案卽與諸正人有忤癸亥例轉
外藩乙丑同前例轉數人皆升京堂以其不附東林也時逆璫
柄政同事附之者皆稱功頌德殺人媚人捷獨介然自持不苟
阿附且周旋周忠毅公于詔獄友誼甚篤彼黨偵知之竟出中
旨指爲阿附黨人爲李某死友著削奪爲民蓋以誤周公爲先
公也是其人可謂中立不倚之君子也至是又以保薦純如謀
翻逆案而敗弘光南渡馬阮用事起位冢宰尤堅執邪說方疏
請追卹諸逆臣重刊要典頒行天下而國已亡矣國亡之日卻
能不降不逃潔身自盡同鄉之人亦稱其居家孝友律己清廉
則蓋棺論定大義皎然獨惜其意見之偏爲耶氛所中深不可
解至不惜甘與同汚也使死而有知推原誤國何人正耶何辨

此時水落石出亦自悔其生前之持論否

文震孟請改修實錄疏略云臣因纂修熹廟實錄從閣中恭請光廟實錄較對見其閒乖誤甚多如先帝冊立及挺擊紅丸諸大事皆祖三朝要典而應和之蓋天啟三年七月實錄進呈禮臣周炳謨等所纂修閣臣葉向高韓爌等所總裁者也天啟六年逆黨崔呈秀等謂實錄非實請旨重修則崇禎元年二月所進今皇史宬之所藏者是時皇上初登大寶要典未燬逆案未成閣臣黃立極等不行奏明含糊從事凡光考二十年青宮之憂患與夫一月天子萬年聖人等事俱隱而不彰斯固臣子所痛心也摘其悖謬宜改正者上聞嘉善票擬要典已燬是非已明據奏皇考實錄是否與要典同異并天啟三年所進該部逐一查議具覆時八月十三日也票入不發直至九月二十七日上御平臺手出此疏面諭輔臣曰皇考潛德青宮二十年憂勤惕厲靡有寧晷雖長幼固有定分皇祖意無偏向然儲貳大事諸臣上疏催請自有職掌

如何說他浮議說他好事溫體仁奏無嫡立長皇祖屢旨申明諸臣不行靜聽屢疏擾瀆反致大典久稽實諸臣之罪上曰雖如此說催請之疏自不可少又如張差持梃闖入東宮此何等大變王之案揭稱其不類瘋癲請集多官會審正是他敬慎處如何反說他謀捏王應熊奏之案原係官箴有玷知不能免故捏此一段以圖自全上曰張差直至殿簷韓本用聚眾擒拏可是之案捏造的後多官會審張差口供歷歷是瘋癲不是瘋癲體仁奏之案此揭原不差但其本意欲借此以自免上曰皇考病亟時李可灼輕進紅丸以致賓天諸臣還是付之不問的是還是據法執奏的是應熊奏可灼本意原欲皇考速愈因皇考久病之後一時挽回不轉上曰君父有疾豈是臣子可以嘗試邀功的當時諸臣不行執奏已自差了反說執奏者不是有此理否體仁奏此皆是逆璫羣小附會造為此論今要典已焚是非已明又屢奉皇上申飭便可垂示萬古上乃將此疏付閣臣改票二十九日奉旨冊立大典皇祖

淵衷默定外庭未知故屢有瀆請然諸臣羽翼國本忠貞難泯張
差實係瘋癲雖無別情然挺擊異變法應重究紅丸輕進諸臣無
一執奏殊欠敬慎但其意亦忠愛諭旨申明即爲定案實錄不必
議改該部知道巴縣所票也同時許士柔亦有系不可略考詳補
贖兩疏繼文疏執爭之文疏請刊定改錄所筆者許疏則摘抉改
錄所削者俱奉不必煩議之旨雖有正論無救邪說皆由閣臣護
奸也安得有信史哉

自己巳之警所調援兵以糧不給脫巾一呼中原游民又以驛遞
裁減無所得食皆挺而走險潰兵與飢民合而流賊起秦晉二省
無處非賊始調總兵曹文詔專勦山西之賊所殺獲頗多可以奏
功未免有自矜之意既而賊勢漸張時有小挫因復調宣大兵勦
之賊復趨秦中總督楊鶴以無功被逮升洪承疇代之洪能撫綏
得軍心勦賊頗著績於是賊復渡河入晉晉撫許鼎臣不能禦賊
南走河南遂闖入鄖陽撫治蔣允儀以兵力單寡連疏叩閣時烏

程柄國修郤構之被逮賊遂蹂躪荆襄直入四川矣

按鄖陽原以村鎮改縣治以其介湖陝河南三省之交山川繇
互盜賊易起故設重臣鎮撫之又以撫綏流民故易巡撫爲撫
治然所轄地方各省自有巡撫主之治臺不能專也萬曆初年
額餉猶有一萬六千王世貞在事以六千改充遼餉以四千發
荆襄兩道自備標兵而數止六千矣標兵三百歲糧止十兩有
奇皆各縣有身家者買頂首以免門戶而覓人充當又義勇二
百歲糧六兩且餬口不足而南下之賊動數十萬雖使武侯復
生亦安能施其堵禦哉蔣公在事屢有疏痛切言之閣部俱不
能照管宜其得罪也代蔣者爲盧公象昇幸以才名素著不數
年卽升總理此後俱無善全者也

流賊初入荆襄廷議設五省總督時有添設少司馬原以備總督
之選彭汝楠汪慶百二人不願行烏程力庇之遂置總督不設至
賊勢燎原始以陳奇瑜爲之專任勦賊賊潰入四川誤涉棧道南

崇禎朝紀事二
北以兵堵塞路口可束手就斃矣賊首乃求撫密遣人賄奇瑜奇
瑜利其賄許之代爲上疏准其自新押回原籍每十人以一安撫
官押送及出險口至草涼樓地方一夜衆賊盡縛諸安撫官或殺
或割耳或委諸道旁復大肆猖獗奇瑜以撫局大壞因請各撫鎮
分地責成欲假此以分過也奉旨總督原以調度各鎮撫道不得
藉口分任弛卸取罪旋革職逮問以烏程之庇僅得遣戍時秦賊
數十萬出關分爲三一自陝州上平陽入晉一自武關向襄陽入
楚一自盧氏東向分犯河南河北河南河北諸賊復分爲三一走
伊汝陷滎汜東北入鄭州復分道犯商州一自葉蔡南圍汝寧一
自懷慶東渡河掠歸德睢汝陳許等州其襄陽賊與汝寧賊合十
五營衆數十萬由固始薄霍邱破之焚壽州正陽鎮破潁州知州
尹夢鼈通判趙士寬闔門死鄉紳兵部尙書張鶴鳴年八十餘矣
賊執而倒懸諸樹引滿射之逼索金帛有賊至持刀劈之自踵至
頂且罵曰若復能坐而鞭吾輩耶人始知其總督時有宿憾者也

時各邑鄉紳死難者不能詳記

鶴鳴天啟初任中樞左袒遼撫王化貞與經略熊廷弼構難致
有遼陽之陷又起奸細一獄爲帥罪移禍地經撫皆得罪言路
攻之僅能免官幸矣逆奄用事夤緣起南司空黔賊未平逆案
李夔龍薦之逆奄於朝中大言曰黔事非鶴鳴不辦雖老可用
也遂改兵部尙書督川湖雲貴軍務賜蟒玉尙方聞其所以獻
媚逆奄者至醜穢不可道崇禎初爲言路瞿式耜胡永順輩論
其剋餉冒功與媚奄諸罪削職家居至是年已八十餘矣熊王
皆相繼正法西市彼獨老而不死安享富貴乃竟戕於流賊之
手慘毒加甚誰謂天道無知乎然繼鶴鳴督雲貴爲朱燮元又
言因其遺略得平安氏蓋其人略有才而伎貪而鄙用爲督
撫或可收效一隅用之中樞不免貽害國事矣

八年六月十六日賊自潁州至陷鳳陽焚皇陵享殿其明樓鐘簾
皆燼毀高牆放罪宗執知府顏容暄杖殺之畱守朱國相指揮包

文達俱力戰不屈死軍民死者凡四千三十五人見給事林正賊
自稱古元真龍皇帝掠陵監所遺響手小奄縱酒奏伎劄孕婦注
嬰兒於槩以笑樂者凡三日

鳳陽向未有賊守備太監楊澤貪殘苛刻商民苦之巡按吳振纓
至商民往懇振纓懼太監不肯受詞閉門以拒商民集其門者三
日日益以眾遂執澤用事武弁俟定國殺之一擁入太監署吳亦
乘閒走矣眾遂焚太監署劫掠城中亂民無主乃集隊執香往迎
流賊蓋土人之亂十五日先發郡寇以十六日始到激變釀禍實
起於澤與振纓撫臣楊一鵬不能弭治又以隱匿遲報俱奉旨拏
問下鎮撫司一鵬為輔臣王應熊座師振纓則溫體仁兒女姻也
兩輔臣力庇之上以皇陵失事重大竟從嚴處一鵬以決不待時
棄市振纓發口外充軍然起變時楊實在數百里外吳見在鳳陽
因亂而逃乃輕重若此蓋以烏程之庇云

文秉曰烏程為吳故所哀大瑞至於屈膝閣體真掃地矣

先是賊自河南將逼安慶有為樞臣張鳳翼言者鳳翼語科臣孫
晉曰賊走南已入絕地此賊不食大米賊馬不食稻草行自斃矣
聞者無不掩口竟不預為設防卒致有鳳陽之變

上以陵寢之變痛憤避殿御青布袍下詔罪己命大小臣工共加
修省詔曰朕倚任非人遂至口猖寇熾以全盛之天下若肯實心
為國何難滅此朝食奈夸詐日聞實巧新鮮觀口三次入邊寇七
年不滅國帑匱訕而征調未已閭閻凋敝而加派難施中夜思維
不勝憤惋乃至今年正月上干皇陵祖恫民仇責實在朕茲擇十
月初三日避居武英殿減膳徹樂以青袍視事示與行閒士卒甘
苦相同之意馳諭督撫徧告行閒仰體朕心共救民命署禮部侍
郎陳子壯因條議寬恤實政蠲租清獄赦罪使過省工東兵豁贖
卹宗改折寬驛旌敘事例凡十二款款內請復祖制盡撤內監則
不利於諸奄議東兵責督撫則不利於諸鎮政府持之欲狹小其
事徒事虛文彌飾於是雖有主上勤恤美意實政終不能下究也

寬卹詔下議及罪譴諸臣嘉善謂刑部宜具各招情節列名疏請先釋罪而後起廢方有次第冢宰謝陞曰此敝衙門職掌疏不可緩疏上臚列無遺并當日得罪情形悉爲粉飾上大怒切責下選郎吳羽文於獄而事不可爲已及覆請一百員票擬僅僅以楊都楊世芳余文燿馬思理高倬劉必達章正宸胡良機楊弘廖大亨張燦垣十一人了局皆烏程一手握定使寬卹德意竟成屯膏其伎如此

給事許譽卿疏論輔臣樞臣云民家邱壠偶傷亦必飲痛今仰惟至尊之痛恨皆樞臣固位失事輔臣玩寇速禍耳賊在秦晉議設總督侍郎彭汝楠規避不行樞臣則謂人曰政府不肯設也賊入豫楚汝柎被論再議設督而在慶百猶汝柎也乃推極邊之陳奇瑜又誤於撫之一說心持兩端而賊已蹂躪東南矣昨冬東南震驚始有淮撫操江移鎮之疏及旨下又曰不必議移以滋煩擾輔臣遂視寢陵爲孤注也又疏曰論輔臣者皆庇私納賄一身一家

之事其於誤國猶小獨此皇陵震驚祖宗怨恫致聖心有在天之隱痛臣誼有率土之公憤此之誤國更孰有大焉者前後連上五疏皆極其痛切同時科道又有何楷范淑泰徐耀吳履中張盛美張肯堂郭維經部臣則賀世盛胡江鄭爾悅相繼抗章不下數十疏而體仁悉以門戶坐之於是聖聰終爲所蔽矣

總河劉榮嗣革職提問時以駱馬河潰決創挽黃之議起宿至徐分黃水通漕運計工二百餘里費金錢五十萬其鑿河處邳州上下悉黃河故道淤土尺餘其下皆沙每挑濬成河經宿沙落河坎復平不可以舟劉遂得罪下獄坐贓父子俱死於獄人皆惜之郎中吳璉分工獨多亦引監守律坐死庚戌秋以魏景琦監決之誤竟致典刑人尤冤之

劉公北直曲周人丙辰進士與先忠毅同年相好也工書善詩好交游頗以經濟自任其門下多游客未免失於輕信東光霍維華者以逆案遣成徐州冀立功贖罪前議實倡於彼也劉方

好奇略遽信之致罹大禍小人之不可作緣如此

禮部署侍郎陳子壯請寬釋河南巡按盧經學道胡澥不聽先是
汴城萊陽王與許州貢生蘇輔宸爭田屢具詞有司不能聽適學
道考試開封萊陽家奴擒蘇族一秀才至家毆之此生原不與輔
宸事諸生咸爲不平先訴之胡繼訴之盧時三月五日三司公謁
按臺萊陽王同八王子亦昇一人來訴以期抵塞在院門外大噪
以輿扛亂打諸生有飛石相擊者諸生不敢動噪乃愈甚萊陽復
在門首裂其衣冠嚼血塗面爲圖賴計院道出示歸咎諸生明日
傳蘇生已死王亦稱被毆傷令其母訴按道又膚愬於周王周王
卽據偏詞入告及按臣疏聞上疑萊陽實被辱地方官私庇諸生
嚴旨遣緹騎逮按道及蘇輔宸等下錦衣衛獄蓋上方崇重藩體
故經藩王疏參者必行重處時盧胡俱到任方兩月竟得嚴譴蘇
生竟死獄中人皆冤之

上以兩國學之士雜而多端無以甄才品施教化乃停止入貲援
例一途命各提學官彙試各學廩膳生員每學拔取一人充貢入
國學巡按爲監臨道臣爲提調分試兩場有分考有謄錄彌封等
官一如鄉試法行之貢入禮部廷試闕下分送兩雍肄業一時與
貢者皆自誇爲奇遇然亦未嘗特拔一人進用也次年又命頒孝
經暨朱子小學於學宮令士子誦習督學官取以命題試士又命
士子兼習騎射於文試畢後又試馬步弓箭鄉會試亦於榜後試
之一時不能文者競以此爲媒進之階矣
諭監修實錄等官朕躬闕皇考前錄頗有失實之處蓋時政予奪
或志在激揚矯抑不得驟言得失卽張疏敷陳亦有風聞臆見難
保盡出公確惟略存當日始末備載所奉明旨一聽後來評繹庶
幾初意不晦今於意合者存其美不同者去其實或突載一節或
單標數語成心偏見滋惑傳疑其於實錄之義何在目今皇兄之
錄未竣應加申諭又諭今士鮮實行人多虛飾其於薦獎乞恩尤
甚以目擊耳聞之事輒要欺人以說鬼說夢之言敢於奏上才難

自古記之何近時之多賢耶賢人多而天下治何宇宙之多故耶
祇足貽譏後世見笑識者亦當禁之二條皆御筆親撰此卽漢詔
之佳者不能幾及後經閣擬反不如矣
故事經筵講書置春秋弗講上獨以春秋有關於撥亂反正傳旨
令選專經者進講時首輔温故以春秋起家詞臣文震孟亦以春
秋著名首輔恐文進講必如前年有諷諫或當上意故隱之而佯
爲搜索狀次輔嘉善指及之首輔佯驚謂幾失其人卽以名進十
月二十四日講至祭伯傳而宰咍歸贈傳贈凶禮也當缺不進講
上特令補進文乃講咍以六卿之長而壞法亂紀自王朝始焉用
彼相上領之旣奉御筆宣諭云宰咍一章正見當時朝政之失所
以當講後以此類推己又講內君子外小人及人臣義無私交一
段大愜聖意爰立之命基於此矣
八年六月二十九日上傳大小九卿詹翰等官召對上御門兩傍
置桌子筆研諸臣行禮畢上諭曰諸臣才品朕未徧知今一試票

擬輔臣六部尙書站於階上其餘分班試於階下兩中官持本一
帙各分一本并二小柬傳諭將內本票擬書柬內一彙一騰試完
命退次日上傳姜逢元陳子壯文震孟張至發蔡奕琛閻仲儼馬
之驥張元佐張居著吏部將履歷年貌開寫來看其在籍諸臣有
堪任閣員者也著從公推幾員來吏部卽將九臣年歷開寫會推
在籍吏部侍郎林釭禮部尙書孫慎行順天府尹劉宗周奉旨召
在籍三臣作速來京爾部馬上催他就道不可遲延至二十六日
奉旨文震孟張至發俱升禮部侍郎入閣辦事先是召對文以病
在告不與官尙爲少詹事張以刑部改入皆新政云自此以後凡
枚卜閣臣必內外兼用亦不論官階大小矣 召起三臣孫以病
卒於途未及陛見林以原官入閣卒於位劉升工部侍郎不久以
建言去

故事新參入直後以名帖及禮帖致掌司禮大璫璫亦來答時
大璫曹化淳係王安名下素附正人託安之姪中書某轉致許

公霞城盛稱曹皈依之意且云舊例固不可失相通一番此後有事亦可相聞好於上前說話許轉述之文公曰無論素不善與若輩往來且同事者方虎視眈眈若稍有一隙反與以口實何以自解卒不與相通未兩月頓失帝眷而見逐矣許公曾爲予述其事深服文公之持正而歎當時揆地之難居如此撤回各鎮監視內臣諭戶兵工三部略曰朕御極之初撤還內臣一應事悉以委之諸臣不意習尙久非營私徇過甚有從而剝削爲升官肥家計者此士大夫負國家也不得已查照成祖監視之例分遣各鎮添兩部總理亦欲諸臣自艾數年來經制稍立錢糧稍清諸臣亦有省於其中矣今將總理監視酌量撤回以信朕之初心惟關寧逼邊高起潛兼監兩鎮京營原有內臣提督照常內而部司外而撫按務要共濟時艱慎始保終永識朕言是諭適在文入閣後一日於是遂有新參居功之說譖於上前矣

輔臣王應熊回籍先是六月初十科臣何楷以皇陵失事參溫體仁王應熊庇撫按楊吳之罪應熊卽於十三日具疏奏辨時何疏尙未奉旨發鈔應熊又方注籍不入閣也何因以預洩機密參之應熊疏認謂家人在直房中鈔出上乃下其家人於錦衣衛獄究問並查擅與中書姓名在直者俱罰俸一年家人王心良發邊衛充軍應熊遂以是去蓋上意旣重漏洩烏程又適被論注籍不能爲庇說者謂長洲實爲之而忌者益眈眈矣

吏部尙書謝陞疏參工科許譽卿福建布政司申紹芳營謀升官許削職申逮問許在大啟時以疏參逆奄謫官時謝爲文選郎中亦以不附奄罷崇禎初同膺環召謝已歷官冢宰而許在垣中資望最深猶守故官以母老欲乞南太常以便養同人不可文擬畱之升太常少卿亦非僭分謝與首輔故難之適臺省同時攻冢宰及總憲許謂須舍謝而專攻唐唐與烏程朋比肆惡尤不可緩也御史張纘曾不通商推特疏獨參謝一人張固同鄉謝乃疑此疏出文許意又山東布政勞永嘉營升登萊巡撫勞固逆案漏網

諸臺省擬合力攻之謝三過戶科宋學顯曲致殷勤求稍徐之候
旨下而攻之未晚且云勞君之座卽申君之座也申故文之姻戚
時任福建右轄待次蓋以此相挾而臺省不能待交章連續有旨
登撫另推東省諸人又懷恨矣兵科宋之普力愆謝謂文許決不
相容將以銓席待南冢鄭三俊及太司農侯恂豈能久畱汝耶謝
己心動適有張之疏遂具疏參許與申坐以爭官講缺有憑藉奧
援語發票時首輔已定意故示商推於同官嘉善謂所奏必當有
據宜行勘或令回奏首輔不然遽票旨云大干法紀著降調夫既
云大干法紀則不僅降調矣次日果發票削籍爲民文爭之不得
乃作色曰科道削籍乃極榮之事許陞辭疏復侵首輔首輔疏辨
遂及文何二輔卽爲民極榮語曰皇上所以鼓勵天下者止此爵
祿位號而震孟所言是以股肱心膂之臣爲悖倫滅法之語疏入
上頗怒得旨吾騶震孟不宜徇私撓亂各具疏引罪何致仕文閒
住未數日復以滅倫二字參庶吉士鄭鄭以鄭爲文同鄉同年相

善逆賢時同以建言謫官故借以引繩批根也鄆居鄉實有穢行
謂可以鉗諸正人之口鄆下刑部獄屢問屢駁同鄉亦不直之竟
以士民公疏再下錦衣衛遂致極典而一時株連者甚多總由温
之險心毒手構成大禍云

河南監紀推官湯開遠由乙科以知兵授是官於五年冬已有兩
疏論時事至是復疏言爲皇上分任勦寇莫如撫鎮乃於撫則用
懲創於鎮則用優遇諸臣受事之始已爲不終朝之計有寧甘禡
革必不肯做者以做亦罪不做亦罪也不做罪輕做罪重也卽有
肯做者而反爲不肯做者掣肘也有旨責其妄言做亦罪等語何
所指著回奏因復奏言皇上爲辨寇而誅督臣一逮督臣撫臣二
褫撫臣二并逮兩按臣道府州縣不可勝紀前後諸帥有一逮且
誅者乎卽以中州言之按臣曾倜捐資濟荒未嘗悠忽竟從逮配
將來無肯做敢做之按臣矣祝萬齡拮据兵食親率兵馳救武安
遽行削籍無肯做敢做之道臣矣史洪謨令宜陽寇無敢薄城六

安之全獨力爲多竟以罪擯無肯做敢做之州縣矣永寧鄉紳張論捐金募兵其子鼎延乞卹並奪其職無肯做敢做之鄉紳矣又如銓司弊藪吳羽文竭力搜剔乃以起廢干怒竟致長繫無肯做敢做之部曹矣皇上不留意分別一下銓司卽議罪議降革一下法司卽議杖議遣配有肯執奏爲不當者乎竊見纍纍諸臣賢者不復以逮爲辱不肖者無復有自奮之心且以狂狴藏身人品與封疆兩盡可不爲寒心哉奉旨革職拏問河南巡按金光宸爲之代請以其戮力行閒殺賊有功准釋放還職

上以祖訓凡郡王子孫有文武才能堪任用者宗人府具以名聞朝廷考驗授以官職其遷除如常名曰換授署禮部陳子壯疏言宗秩換授適開僥倖之門其事有不便者三不可行者五上怒甚有非祖閒親之旨遂下陳於刑部擬贖徒放歸先已有宗藩儀節之議始於唐王上疏部議屢上屢駁至是上益怒欲加廷杖曹璫跪諫乃止未幾唐王杖殺二郡王上不憚又因邊警請統兵勤王


上遂密敕撫按押發鳳陽高牆至十七年以淮撫路振飛疏保赦出乙酉南都失守鄭鴻逵等擁至閩中登大位號隆武閩破被執蒙塵 宗室以科目起家始自天啟辛酉其能文者江右爲最楚蜀次之寧藩宗室有朱統鈔中辛酉戊辰兩榜選庶常有言宗室不便入館者改中書卽告假去至宜興當國閔弘學秉銓以其疏請改館職壬午爲南畿副考又有甲戌進士朱寶符賜名統鏗朱鉅賜名奉鉅皆庶宗未請名祿者中式後賜名皆出特旨庚辰年又有朝覲縣令朱露上疏逢迎時事召對授給事中賜名統鏘此其最著者自換授法行皆是親王保舉優者得中書次則府佐州縣官諸宗在仕途者幾八十矣大都以營謀得之換授易而科目難使諸宗不務讀書專務鑽刺及入仕途益多不法公私苦之

乙亥十二月二十六日賊犯和州知州黎弘業嬰城固守二十八日賊用梯攻城上發礮擊殺數百人賊復頂上方桌掘城城上擲薪燒之已而風雪漸急城上人不能支有散走者賊遂得蟻附而

登黎時有母隨任知事不可爲視其母自縊死大書於壁曰爲臣
不負君爲官不負民忠孝誠已盡生死安足論書畢自縊而死一
門死者十有餘人有幼子以先隨母還家得免同死者又有學正
康正諫鄉紳侍御馬如蛟事聞黎贈光祿寺卿賜祭賜葬廕子餘
各贈卹有差

黎公廣東順德人天啟辛酉舉人先忠毅時以南康推官應聘
分考本房共得士七人黎公其一也工詩善書淹博風雅時稱
名士尤篤於氣誼所以周視師門者甚至乃竟與先忠毅同以
節義傳真無愧及門矣

崇禎朝記事卷二



70030521

